

Revelesen Nægkiariien sə rani mə nəfe i nəkukuə

Jon in aposol riti səvəi Iesu Kristo. Nəp̄in kinərhi irapw in revən fwe tənə əmweris riti nəgh̄in nə Patmos nənə mirai nəkukuə i Revelesen. Jon rokeikei mə truvehi utə nətərigien səvəi nakalasia me səməme kamo nəmisəien m̄inraha ti nahatətəien səvənraha ia Iesu Kristo. Jon rokeikei mə nakalasia me tuhəukurən mə Kumwesən ramərimənu ia nəfe kamo ia t̄iprənə i. Ia nəkukuə i Nənimw̄in raməgkiari mamō səukurən mə Iesu Kristo in Iərimənu. In ramərimənu ia nərmama me pam m̄ine narimnari me pam, mamərimənu mwi ia nərmama səməme haməuvehi n̄iskaiien asori ia t̄iprənə i. Kumwesən trərpw̄in noien ərəha me səvəi nərmama m̄ine Setan ia kwopun napw rauək ik̄in. Kumwesən tro n̄itətə sə in ramərimənu irə trier irapw. In tro mwi neiai vi riti m̄ine t̄iprənə vi riti.

Nægkiariien sə rakupwən

¹ Nəkukuə i raməgkiari ia nari m nari me səməme Iesu Kristo r̄ino pui. Kumwesən riməuvei pen narimnari me i min mə in trahatən səvənhi iotukwininari me irə pwəh irəha hətoni mhəukurən narimnari me nəha r̄ipko mhə tui tuhaməkeikei mhəier pehe. Iesu rərhi pen agelo səvənhi revən məvisau pen narimnari me i m səvənhi iotukwininari riti nəgh̄in nə Jon. ² Jon nə r̄irai pen ia nəkukuə

i narimnari me pam sə in rīnətoni. In i nəgkiariien səvəi Kumwesən mīne nəgkiariien sə Iesu Kristo rīni mə ro nīpərhiēnien. ³ Pwəh Kumwesən rəkwein amasan ia iərmama sə trəvsini irapw nəgkiariien me ia nəkukuə i. Pwəh in rəkwein amasan mwi ia səməme tuhəregi mhesi pen nəfe kīmərāi pen ia nəkukuə i. Iakani iamīnhi irə tī nəri nə mə nəpīn sə narimnari me i tuhəier pehe irə ruvəuvehe ipaka.

Jon rīrai nəkukuə i revən tī nakalasia me ia taon me nəha sefen ia profens Esia

⁴ Iou Jon iakamrai nəkukuə i rauvehe tukumiaha nakalasia me ia taon me nəha sefen ia profens Esia. Iakəfwaki mə Kumwesən sə rīnarə fwe kupwən, marə ipwet mīne, mamevən meste trīpkiwən mhə, in truvei pehe namasanien mīne nəmərīnuiēn m kīmīaha. Iakəfwaki mə nənimwīn me nəha sefen kupwən ia jea sə in raməkure irə mamərīmənu, ⁵ mīne Iesu Kristo irəha mwi tuho iamīnhi irə. Iesu Kristo in iərmama i rīmāni irapw nəfe in rīnətoni mīregi nərmama həkurən nətīgiteien ia nəgkiariien səvənhi. In iərmama i rīməkupwən mətui ia nərmama me səməme həuvamhə. In iərmama i ramərīmənu ia kīg me səvəi tīprənə i. In ramokeikei kitaha, muvi nīten meivinari ia kitaha irə mə noien ərəha me səkitaha ko həkəkwtəmhirī mhə mwi kitaha. ⁶ In ro kitaha səmwhen ia kīg me mīne pris me ia nəmri Tata Kumwesən səvənhi. Pwəh nasorīēn mīne

1:3: Rev 22:7,10 **1:4:** Eks 3:14-15, Rev 1:8, 3:1, Rev 4:5,8, 5:6, Rev 11:17, 16:5, Aes 11:2 **1:5:** Jon 18:37, Kol 1:18, Sam 89:27, Rev 3:14, 17:14, 1Jon 1:7, 4:10 **1:6:** 1Tes 2:5,9, Rev 5:10, 20:6

nərimənuien krauevən tukwe in ia nuk nuk me. Ouəh pwəh ro iamɪnhi.

⁷ Hətə ro. In rauvehe ia reri nəpuə me.

Nərmama me pam tuhətoni in ia nənimenraha.

Irəha səməme hənəpi in ia nitei,

mɪne nərmama ia kwənəkwas me pam ia təkure tɪprənə i tuhətoni, rerinraha rəpou hasək tukwe.

Ouəh pwəh ro iamɪnhi.

⁸ Kumwesən səkitaha rani iamɪnhi irə mə, “Iou i Alfa mɪne Omeka.^a Iakinərə fwe kupwən, marə ipwet mɪne, mamevən meste tapkiwən mhə. Iakauvehi niskaiien me pam.”

Jon rətoni Iəməti Iərmama

⁹ Iou Jon piəvmiaha riti. Kitaha miou samarə pəri ia nəkwai nitətə Iesu ramərimənu irə. Iakamərer əknekin kitaha m kimiaha ia nəmisəien me səməme kamo m kitaha ti nəghin. Nəpin riti fwe kupwən kəmri pen iou iakarə ia tənə əmweris riti nəghin nə Patmos.^b Irəha həmri pen iou fwe ikɪn ti nəri nə mə iakaməvisau irapw nəgkiariien səvəi Kumwesən mɪne nəgkiariien sə Iesu rini mə ro nɪpərhiennien. ¹⁰ Ia nəpin səvəi Iərimənu səkitaha iakətoni vison riti Nənimwɪn rəriari miou. Ia vison nəha iakregi iərmama riti raməgkiari ia təkutak rerin rasori rəmwhen

1:7: Mat 24:30, Jon 19:34-37 **1:8:** Rev 1:4, 15:3, Rev 21:6, 22:13

^a **1:8:** Alfa in leta sə rukupwən ia alfapet səvəi nəkur Kris. Omeka in leta sampam. Nahag i kaməkwein Kumwesən irə nɪpwran mə in nukunen mɪne nəkrəkwerin. Əvsini mwɪ Rev 21:6, 22:13. **1:9:**

Rev 6:9 ^b **1:9:** Patmos in tənə əmweris riti kəmri pen Jon fwe ikɪn rəmwhen mə in ramarə ia kalapus.

ia kisipw, ¹¹ mīni mæ, “Rai pen ia nækukuæ næfe ikamætoni, nænæ mærho pen nækukuæ næha revæn ti nakalasia me sæmæme kamharæ ia taon me næha sefen. Næghi taon me næha Efesas mīne Smāna mīne Pekamam mīne Tuatira mīne Satis mīne Filatelfia mīne Laotisia.”

¹² Iakuvsiini iou mæ takætoni mæ sin næha ramægkiari pehe miou. Næpīn ikuvsini iou mætoni næri laet ramækure utæ iræ iræha pam sefen kīno ia kol. ¹³ Ia kūrkwānraha iærmama riti ræmwhen ia iæmæti iærmama riti. Tinari sævænhī ræpwæmwis. Rækwani nari kīno ia kol rukurau ia kwænpwenhin. ¹⁴ Nīmwai nukwænen ræpsan ræmwhen ia nīmwheri sipsip. Ræpsan pīk ræmwhen ia nisækwai tæsi.^C Nænimen mi krouæmwhen ia nærami napw. ¹⁵ Nīsun mi krauser rouæmwhen ia aean næha prons sæ kuvani ia napw mæ sæ ræræha traiu raka. Rerīn ræmwhen ia nui asori sæ ramivæ mamierig. ¹⁶ In rauvehi kæmæhau me sefen ia rægīn mwatuk. Nau sævæi naruagænien ræhiæ ia nīkaren mi ruku pen ia nīpægi nækwan mier. Nænimen ræmwhen ia meri sæ ramæhiapw ia rukwæsikær.

¹⁷ Næpīn iakætoni iæmæ næha iakmwei irapw ia nīsun mi ræmwhen iakemhæ. Mætæ in ræmri pehe rægīn mwatuk ia nirak, mīni mæ, “Tikæpwæh nehekīrien. Iou iærmama i iakīnaræ raka kupwæn, nænæ takaræ mwī kuriræ. ¹⁸ Iou iærmama i iakamīru. Fwe kupwæn iakimamhæ, mætæ ætæ ro tækwætækwuni iakuvæmīru takimīru ia nuk nuk me.

1:13: Dan 7:13, 10:5 **1:14:** Dan 7:9, 10:6, Rev 2:18, 19:12, Rev 14:2 ^C **1:14:** Nægkiariien sævæi nækur Kris ramīni iamīnhi iræ mīnuæ “Ræpsan pīk ræmwhen ia sno.” **1:16:** Hip 4:12, Rev 1:20, Rev 2:12,16, Rev 19:15,21 **1:18:** Aes 44:6, 48:12, Rev 2:8, 22:13

Iou iakasori ia Noien Iærmama Remhæ, masori mwi ia Imwei Nækur Hæuvamhæ.^d

¹⁹ Ro pen tikamækeikei mirai pen ia nækukuæ narimnari me i ikamætoni, sæmæme kamo ipwet mine, mine sæmæme tuhæuvehe kuriræ. ²⁰ Takini pehe tukw ik i nipwrai kæmæhau me i iræha pam sefen ikamætæ ia rægik mwatuk mine nipwrai næri laet ramækure utæ iræ iræha pam sefen kino ia kol. Kæmæhau me næha sefen iræha næha nagelo me sævæi nakalasia me sæmæme kamharæ ia taon me næha sefen. Nænæ næri laet ramækure utæ iræ iræha pam sefen kino ia kol iræha næha nakalasia me sæmæme kamharæ ia taon me næha sefen.”

2

Nægkiariien ramevæn ti nakalasia me fwe Efesas

¹ “Rai nækukuæ riti revæn ti agelo sævæi nakalasia me ia taon næha Efesas, mini pen minuæ:

Nægkiariien i sævæi iærmama sæ rauvehi kæmæhau sefen ia rægîn mwatuk, nænæ, mamavæn ia kurkwai næri laet ramækure utæ iræ iræha pam sefen kino ia kol. ² Iou iakukuræn noien me sækimiaha. Iakukuræn mæ hiamæmwur pik mamhærer æknekin ia næpin me. Iakukuræn mæ hiamærapinhæ ia nækur æræha. Hiænækiri noien sævæi nærmama me næha kamhæni mæ iræha aposol me mætæ ripko mhæ iræha pærhien, nænæ, hiænætoni raka mæ iræha kamheikuæ. ³ Iakukuræn mæ ia næpin me kamo

d **1:18:** Nægkiariien sævæi nækur Kris ramîni iamînhi iræ minuæ “Iou iakauvehi ki me sævæi Noien Iærmama Remhæ mine Imwei Nækur Hæuvamhæ.” **1:19:** Rev 1:1 **1:20:** Rev 1:16, 2:1, Rev 3:1 **2:1:** Rev 1:16; 20 **2:2:** Rev 2:19, Rev 3:1,8,15, 1Jon 4:1

nəmisəien m kimiaha ti nəghik, mətə hiamərer əknekın ia nahatətəien səkimiaha mhəpwəh nəpouien.

⁴ Mətə nari riti nəha ikin hiamo rıpkatukwatukw mhə ia nənimək. Kimiaha hiənpwəh nokeikeien kupwən səkimiaha.

⁵ Ro iamınhi irə rerimiaha tramrhi nərerien sə hiənərer irə fwe kupwən kurirə hiəmwei. Tihərərığ ia noien ərəha me səkimiaha, mho narimnari me nəha sə hiənamo fwe kupwən. Trini minuə hiəpwəh nıərəıgıen ia noien ərəha me səkimiaha, nənə takuvehe tukumiaha muvehi raka səkimiaha nəri laet raməkure utə irə ia təmwhekin. ⁶ Mətə nari kuatia nəha ikin hiamo ramasan. Kimiaha hiəmwəki noien me nəha nərmama səvəi Nikolas kamho rəmwhen iou mwi iakəmwəki.

⁷ İərmama sə nəkwəregın rarə traməkeikei mətərığ amasan ia nəgkiariien me səməme Nənimwın İkinan rani pen ti nakalasia me. İərmama sə triskai meste naruagəniien rukurau, iou takəsəni in rəni nukwai nei kauvehi nımıruien irə ramərer ia kwopun nəha Parataes səvəi Kumwesən.”

Nəgkiariien ramevən ti nakalasia me fwe Smana

⁸ “Rai nəkukuə riti revən ti agelo səvəi nakalasia me ia taon nəha Smana, mini pen minuə:

Nəgkiariien i səvəi iərmama sə rınarə raka kupwən, nənə trarə mwi kurirə. In remhə mətui mwi. ⁹ İou iakukurən nəmisəien səkimiaha. İakukurən mə səkimiaha nautə riwən. (Mətə

2:5: Rev 2:16,22, Rev 3:3,19 **2:6:** Sam 139:21 **2:7:** Jen 2:9, Rev 22:2,14,19 **2:8:** Rev 1:17 **2:9:** 2Kor 11:14-15, Jem 2:5, Rev 3:9

ia nənimek nautə səkimiaha rasori anan.) Iakukurən nəgkiariien ərəha me nəha nərmama nerpwin kəmhəni ia kimiaha. Irəha kəmhəni mə irəha nəkur Isrel, mətə rekəm. Nəusəsimwinien səvənraha səvəi Setan. ¹⁰ Tihəpwəh nehekiriien nəmisəien i tripkə mə tui reste kimiaha. Həregi ro. Setan tripkosə pen kimiaha nerpwin ia kalapus mə tro mətə sas ia nahatətəien səkimiaha. Tihəregi nəmisəien ia nəpin me i irəha pam ten. Kimiaha tihəməkeiki mhərer əknekin nəri auər a trini minuə kousi əpune kimiaha, nənə iou takuvei pehe nimiruien m kimiaha rəmwhen kəfəfau pen kəfəfau amasan ia kənkəpwə iərmama sə rəvtənhi nərmama ia naiuien.

¹¹ Iərmama sə nəkwəregin rarə traməkeiki mətəriḡ amasan ia nəgkiariien me səməme Nənimwin Ikinan rani pen ti nakalasia me. Iərmama sə triskai meste naruagəniien rukurau in trəpwəh nemhəien ia nemhəien sə ro kəru irə.”

Nəgkiariien ramevən ti nakalasia me fwe Pəkamam

¹² “Rai nəkukuə riti revən ti agelo səvəi nakalasia me ia taon nəha Pəkamam, mini pen minuə:

Nəgkiariien i səvəi iərmama sə rauvehi nau səvəi naruagəniien rəhiə ia nikaren pəri mi.

¹³ Iou iakukurən kwopun hiamarə ikin. Jea sə Setan raməkure irə məmərimənu in nəha ia kwopun nəha, mətə kimiaha hiamuvehi əknekin nəghik ia nəpin me, mhəpwəh nərkwafəien i

mə hiamahatətə ia nirak. Pərhiən hiəpwəh mwi nərkwafəien i fwe kupwən nəp̄in Antipas ramarə ihi. In iərmama riti səiou iakukurən nətigiteien irə. Rinərer irapw mægkiari ia nirak kousi əpune in ia taon səkimiaha, kwopun Setan ramarə ikin. ¹⁴ Mətə narimnari me nepw̄in nəha ikin hiamo həpkatukwatukw mhə ia nənimek. Kimiaha me nepw̄in kamhəkurirə nahatəniən səvəi Palam. Palam nəha in rinahatən Kig Palak mə in trərhiərhi nəkur Isrel pwəh irəha ho noien ərəha, mhani nəveginien sə kiməuvei pen m nənimwi nari me sə kaməfwaki pen minraha, nənə, mhəiri əpnəpen irəha me. ¹⁵ Ia noien nəha kimiaha nepw̄in mwi kamhəkurirə nahatəniən səvəi nərmama me səvəi Nikolas. ¹⁶ Ro iam̄inhi irə tihərərig ia noien ərəha me səkimiaha. Mə hiəpwəh, tripkə mhə tui iakuvehe tukumiaha, mousi nərmama me nəha, mərai irəha ia nau səvəi naruagəniən sə ruku pen ia n̄ipəgi nəkwak mier.

¹⁷ Iərmama sə nəkwəreḡin rarə traməkeikei mətərig amasan ia nəgkiariien me səməme Nənimw̄in Ikinan rani pen ti nakalasia me. Iərmama sə triskai meste naruagəniən rukurau takuvehi nəveginien i ramərkwafə, nəghin nə mana, muvehi muvei pen min. Nənə takuvei pen mwi kəpwier əpsan riti min sə kimərai pen nəhag vi irə. Nəhag vi nəha nərmama həreirei. Iərmama sə truvehi kəpwier nəha in əpa trukurən.”

Nəgkiariien ramevən ti nakalasia me ia Tuatira

18 “Rai nəkukuə riti revən ti agelo səvəi nakalasia me ia taon nəha Tuatira, mīni pen mīnuə:

Nəgkiariien i nəgkiariien səvəi Tini Kumwesən sə nənimen mi krauəhiapw rəmwhen ia napw, nənə nisun mi krouəmwhen ia aean i pras sə kinahakwi kahakwi amasan. 19 Iou iakukurən noien me səkimiaha. Iakukurən nokeikeien səkimiaha, mīne nahatətəien səkimiaha, mīne nasituien sə hiamō m nərmmama. Iakukurən mə hiamərer əknekīn ia nəpīn me. Iakukurən mə noien amasan me hiamō ipwet mīne irəha həpīk mhəpi raka noien amasan me hianamo fwe kupwən.

20 Mətə nari riti nəha ikīn hiamō rīpkatukwatukw mhə ia nənimək. Kimiaha hiaməsēni noien səvəi pran nəha Jesepel. In rani mə in profet riti, mətə nahatənien səvənhi rameikuə ia iotukwininari me səiou, mamō irəha nərman mīne nīpran kamhəiri əpnapen irəha me, nənə mamhani nəveginien sə kiməuvei pen m nənimwi nari me səməme kaməfwaki pen mīnraha. 21 Iakeitenhi pran nəha mə in trīrərig ia noien ərəha səvənhi, mətə in rəpwəh nokeikeien mə tro iamīnha irə. 22 Ro pen, hətoni ro, takuvei pen nemhəien skai riti mīn, mərarki irapw in raməmisə a ia nīməhan səvənhi. Nərmmama me nəha kamhō əpnapen nari irəha mīn takərarki pen irəha ia nəmisəien asori. Tako iamīnha irə trīni mīnuə irəha həpwəh nīrərigien ia noien ərəha me səvəi

prən nəha. ²³ Nənə nīpwnəti prən nəha takousi əpune irəha. Ro iamīnhi irə nakalasia me pam tuhəukurən mə iou i iərmama iakamətə pui nətərigien səvəi nərmama mīne rerinraha me, nənə takərpwīn pehe nərəkuien m kīmiaha kuatia kuatia resi pen a noien me səkīmiaha.

²⁴ Mətə iakukurən mə kīmiaha me nepwīn fwe Tuatira hiəpkukurirə mhə nəgkiariien səvəi Jesepel. Hiəreirei nəgkiariien me nəha kamīni mə, ‘Nəgkiariien anan me səvəi Setan in ramərkwafə ia təkutan.’ Iakani pehe tukumiaha i mə nari pam riti mwi riwən sə takəmri pehe ia kīmiaha mə tiho, ²⁵ mətə tihaməkeikei mhəkwtəmhiri əknekīn nəri sə hiəuvəuvehi raka meste takuvehe.

²⁶ Iərmama sə triskai meste naruagəniien rukurau, mamo mwi nəfe iakīmāni mə tro mevən meste nəpīn sampam, iərmama nəha takuvei pen nasoriien min, in trasori ia nərmama ia tənəmtənə me.

²⁷ ‘In truvehi nəri skai riti sə rəmwhen ia nep ramahatən pen nasoriien səvəi kīg. In tramərimənu ia nirəha, mamətəftefi irəha rəmwhen kamousi testesi tekinari me i kīno ia nise tīprənə.’

²⁸ Nīpərhienien iou takuvei pen nasoriien min rəmwhen Tata səiou riməuvei pehe miou. Nənə takuvei pen mwi kəməhau i kofətəteia min.

²⁹ Iərmama sə nəkwəregīn rarə traməkeikei mətərig amasan ia nəgkiariien me səməme Nənīmwin Ikinan rani pen tī nakalasia me.”

2:23: Sam 7:9, Jer 11:20, Jer 17:10, 2Tim 4:14, Rev 20:12-13

2:25: Rev 3:11 **2:27:** Rev 12:5 **2:28:** Rev 22:16

3

Nægkiariien ramevæn ti nakalasia me fwe Satis

¹ “Rai nækukuæ riti revæn ti agelo sævæi nakalasia me ia taon næha Satis, mini pen minuæ:

Nægkiariien i sævæi iærmama sæ rauvehi nænimwîn me sævæi Kumwesæn iræha pam sefen, nænæ mauvehi mwi kæmæhau me iræha pam sefen. Iou iakukuræn noien me sækimiaha. Iakukuræn mæ kani næghimiaha mæ kimiaha hiamæmiru, mætæ rekæm. Kimiaha hiæuvamhæ raka. ² Hætui ræ! Tripko mhæ tui noien amasan me sækimiaha hiænamo fwe kupwæn tuhæiwæn anan. Mætæ tihamækeikei mhousari mæ tihæuvehi utæ mwi noien me sækimiaha mho hæuvehe mhæskai, ti næri næ mæ iakæpwæh ihi nætoniien noien amasan riti sæ hiæno mhæuvæn mho sampam iræ nænæ ratukwatukw ia næmri Kumwesæn sæiou. ³ Ro pen rerimiaha tramrhi nægkiariien sæ hiæuvæuvehi raka mhæregi kinahatæn kimiaha iræ fwe kupwæn. Tiho nægkiariien næha, mhærærig ia noien æræha me sækimiaha. Trini minuæ hiæpwæh nætuiien, takuvehe tukumiaha ræmwhen ia rakres, nænæ tihæreirei næfe næpin takuvehe tukumiaha iræ.

⁴ Mætæ kimiaha nepwîn a næ ia Satis tinari sævænraha ripkæmkemik mhæ ia noien æræha. Iræha tuhavæn iræha miou ia tinari æpsan ti næri næ mæ iræha hatukwatukw. ⁵ Iærmama sæ triskai meste naruagænien rukurau in trarkahu ia tinari æpsan, nænæ ko iapkuvehi raka mhæ næghin ia nækukuæ sævæi nimiruien. Ia næmri

Tata səiου mine nəmri nagelo me takini irapw nəghin mə in iərmama riti səiου. ⁶ Iərmama sə nəkwəregin rarə traməkeikei mətərig amasan ia nəgkiariien me səməme Nənimwin Ikinan rani pen ti nakalasia me.”

Nəgkiariien ramevən ti nakalasia me fwe Filatelfia

⁷ “Rai nəkukuə riti revən ti agelo səvəi nakalasia me ia taon nəha Filatelfia, mini pen minuə:

Nəgkiariien me i səvəi Iəmə Ikinan, Iəmə sə rani nıpərhiien. In rauvehi ki səvəi Kig Tevit. Trini minuə rəsevər ia təpinhə riti, iərmama riti ko rıpkərəpinhə mhə. Nənə trini minuə in rərəpinhə ia təpinhə riti, iərmama riti ko rıpkəsevər mhə. ⁸ Iou iakukurən noien me səkimiaha. Hətoni ro. Iakinəsevər ia təpinhə riti tukumiaha, təpinhə i iərmama riti ko rıpkərəpinhə mhə. Iakukurən mə nıskaiien səkimiaha rouihi a, mətə hiaməkwtəmhiri nəgkiariien səiου, mhəpwəh nərkwafəien mə kimiaha nərmama me səiου. ⁹ Həregi ro. Nərmama me nəha ia nousəsımwınien səvəi Setan həni mə irəha nəkur Isrel (mətə rekəm irəha ieikuə me) iou tako irəha həuvehe mhənımwı nukurhunraha ia nisumiaha, mhəsiai kimiaha, nənə mhəukurən mə iou iakokeikei kimiaha. ¹⁰ Nənə ti nəri nə mə kimiaha hiaməkwtəmhiri nəgkiariien səiου, mamhərer əknekin ia nəpin me, iou mwi takəkwtəmhiri kimiaha, mamarə tukumiaha ia nəpin sə rıpkə mhə tui ruvehe nərmama me

pam ia təkure tīprənə tuhəregi nəmisəien irə mə trətə sas ia nahatətəien səvənraha.^a

¹¹ Triṗko mhə tui iakuvehe. Tihəkwtəmhiri əknekīn narimnari me səməme hiəuvəuvehi raka mə iərmama riti trəpwəh nakresien nərəkuien səkimiaha sə hiamaiu tukwe.

¹² Iərmama sə triskai meste naruagəniēn rukurau, iou tako in rəmwhen ia nei skai riti krīpesu nimwə səvəi Kumwesən səiou irə. Nənə in triṗkier mhə ia nimwə nəha ia nəṗin riti. Nənə takrai pen nəghi Kumwesən səiou irə, mine nəghi taon səvəi Kumwesən səiou irə. Taon nəha in Jerusalem vi sə truku pen ia neiai meiwaiu pehe. Nənə takrai pen mwi nəghik vi ia iərmama nəha. ¹³ Iərmama sə nəkwəregin rarə traməkeikei mətərig amasan ia nəgkiariēn me səməme Nənīmwin Ikinan rani pen ti nakalasia me.”

Nəgkiariēn ramevən ti nakalasia me fwe Laotisia

¹⁴“Rai nəkukuə riti revən ti agelo səvəi nakalasia me ia taon nəha Laotisia, mini pen minuə:

Nəgkiariēn i səvəi iərmama i kani nīpərhiēniēn irə. In iərmama sə rīməni irapw nəfe in rīnətoni mīregi nərmama həukurən nətiḡiteien ia nəgkiariēn səvənhi mə ro

a 3:10: Suatuk riti mwi ti niniēn nəgkiariēn ia vas ten rini iamīnhi irə minuə: “Nənə ti nəri nə mə kimiaha hiaməkwtəmhiri nəgkiariēn səiou, mamhərer əknekīn ia nəṗin me, iou mwi takəkwtəmhiri kimiaha, məpwəh nəseniēn hiətoni nəṗin sə riṗko mhə tui ruvehe nərmama me pam ia təkure tīprənə tuhəregi nəmisəien irə mə trətə sas ia nahatətəien səvənraha.” **3:11:** Rev 2:10,16 **3:12:** Aes 62:2, 65:15, Esik 48:35, Rev 14:1, 21:2 **3:14:**

Rev 1:5, 19:11, Kol 1:15

nīpārhiēnien, nənə in nukune narimnari me pam sēməme Kumwesən rino. ¹⁵ Iou iakukurən noien me səkimiāha. Iakukurən mə kimiāha hiəmwhen ia nui əreuən. Hiəpwəh nəkwieien mhəpwəh nəpnəpanien. Iakuə ko hiəkwiei uə hiəpnəpan ramasan. ¹⁶ Mətə kimiāha hiəreuən a, mhəpwəh nəpnəpanien, mhəpwəh nəkwieien. Ro pen takərgavəs raka ia kimiāha, ¹⁷ ti nəri nə mə hiaməni mə nautə səkimiāha rasori, narimnari me pam rarə tukumiāha, tihətui nari riti mwi ti nəfe. Mətə hiəreirei mə ia nənimek kimiāha nautə səvənraha riwən, nənimekiāha rīfwə, tinari riwən ia nīpwramiāha, nīmapwmapw me ro kimiāha, nərmama hətoni kimiāha rerinraha raməpou. ¹⁸ Ro iamīnhi irə iakaməvəhag m kimiāha mə tihaməkeikei mhəuvehi nəmri aean i kol tukw iou, kol i kosə pen ia napw rahi raka sə rərəha məpwəh sə rəmher. Tiho iamīnhi irə mə nautə səkimiāha trasori. Nənə tihaməkeikei mhəuvehi nəmri tinari əpsan me tukw iou, mharkahu irə, pwəh ruvegi nīpwramiāha sə ramo naurisien ia nəmri nərmama. Nənə tihaməkeikei mhəuvehi mwi nəmri nari i ramomasan nəkwai nəmri iərmama, mahakwi nəmriāha irə, pwəh nəmriāha rətui hiətoni amasan nari. ¹⁹ Nərmama sēməme iakokeikei irəha, iakaməgkiari skai mīnraha, mamərpwi atukwatukw irəha. Ro iamīnhi irə tiho rerimiāha pwəh ruvehe məpnəpan, mapwor, nənə mhərərīg ia noien ərəha me səkimiāha.

3:15: Rom 12:11, Rev 2:2 **3:17:** Hos 12:8, 1Kor 4:8, Luk 12:21

3:18: Aes 55:1, Jem 2:5, Rev 3:5, 4:4, Rev 16:15 **3:19:** 1Kor

11:32, Rev 2:5

²⁰ Hæregi ro! Iakamærer ia kwæruæ, makunkun tæpinhæ ti nuvniwæien. Trini minuæ iærmama riti riregi rerik, nænæ mæsevær ia tæpinhæ, iou takuvnimwæ pehe kimrau min trouæni pæri nari.

²¹ Iærmama sæ triskai meste naruagænien rukurau, takæseni in rækure kimrau min ia jea sæiou rouærimænu. Tako iræ ræmwhen kino ia nirak. Iakuvæskai raka ia naruagænien meste rukurau, nænæ tækwækwuni iakamækure kimrau sæiou Tata ia jea sævænhi rouærimænu.

²² Iærmama sæ nækwæregin raræ tramækeikei mætærig amasan ia nægkiariien me sæmæme Nænimwîn Ikinan rani pen ti nakalasia me.”

4

Jea riti fwe ia neiai Kumwesæn ramækure iræ mamærimænu

¹ Iakinætæ pam narimnari me i, nænæ mæti pen mætoni tæpinhæ riti ia neiai ramækweg. Nænæ iærmama næha iakuværegi raka rerin fwe kupwæn rægkiari pehe mwi miou, rerin rupwinari ræmwhen ia reri kisipw, mini mæ, “Utæ pehe ia kwopun i. Iakuæ takahatæn narimnari me sæmæme tuhæuvehe kuriræ pwæh ikætoni.” ² Tækwækwuni mwi iakætoni vison riti Nænimwîn ræriari miou. Jea riti kærpwi ramærer ia neiai, Iæmæ iti ramækure iræ mamærimænu. ³ Iæmæ næha ramækure iræ ramser ræmwhen ia kæpwier amasan mi kæru jasper mine kanilian. Nænæ mæraræn riti rukuraukurau ia jea sævænhi makuraan ræmwhen ia kæpwier amasan

riti emeral. ⁴ Jea me nepwīn mwi irəha pam twenti-fo hərəer kuraukurau jea nəha. Nəmə asori me irəha pam twenti-fo kamhəkure ia jea me nəha. Tinari me səvənraha həpsan. Ia kənkəpwənraha kəfəfau me səvəi nisaiien kīno ia kol. ⁵ Iəmə nəha raməkure ia kurkwan mamərimənu, nouapiriien mine karuəruə mine nərkərikien kamharuku pen ia jea səvənhi. Kupwən ia jea səvənhi nərami napw irəha pam sefen kamhəuək. Nərami napw me nəha irəha nənimwīn me səvəi Kumwesən irəha pam sefen. ⁶ Nənə kupwən ia jea səvənhi nari riti mwi fwe ikin rəmwhen ia təsi, mətə rəmwhen ia klas sə rəriri məmher. Nərimiru me nepwīn irəha pam kefə kamhərəer kuraukurau jea səvənhi nukwai nənimenraha həpik ia nīpwranraha kupwən mine kurirə. ⁷ Nərimiru me nəha sə kupwən irə rəmwhen ia laeon, sə ro kəru irə rəmwhen ia kau, sə ro kahar irə kənkəpwə rəmwhen ia kənkəpwə iərmama, nənə sə ro kefə irə rəmwhen ia mīrup sə ramivə. ⁸ Nərimiru me nəha kefə kuatia kuatia tərəginraha me sikis, nənə ia reri tərəginraha me mine təkurenraha nukwai nənimenraha həpik. Nəpīn me pam, ia nəpīn mine ia ran, irəha həpkəpwīs mhə ti noskəfəien i mə,
 “Iəmə ikinan, Iəmə ikinan, Iəmə ikinan,
 Iərimənu Kumwesən sə rauvehi niskaiien me pam!
 In rīnarə fwe kupwən, marə ipwet mine, mamevən meste tripkwīwən mhə.”

4:4: Aes 24:23, Rev 3:18, 6:11 **4:5:** Esik 1:13, Rev 1:4, 8:5, Rev 11:19, 16:18 **4:6:** Esik 1:5-10,22, Esik 10:14 **4:8:** Aes 6:2,3, Esik 1:18, 10:12, Rev 1:4,8

⁹ Ia nīpu nāha, nārīmīru me nāha kamhəgnəgini Iəmə sə raməkure ia jea səvənhi mamərimənu. Irəha kamhəsiai in, mamhəni vivi Iəmə sə ramarə ia nuk nuk me. Nəpīn irəha kamho iamīnhi irə, ¹⁰ nənə nəmə asori me nāha twenti-fo heiwaiu mhənīmwi nukurhunnraha ia nəmri Iəmə sə raməkure ia jea səvənhi mamərimənu. Irəha kamhəsiai Iəmə sə ramarə ia nuk nuk me, mamhərki pen səvənraha kəfəfau me səvəi nisaiien kupwən ia jea səvənhi, mamhoskafə iamīnhi irə mə,

¹¹ “Iərimənu mīne Kumwesən səkimaha ikamasan pik.

Ikino narimnari me pam,

mesi pen nətərigien səim mo irəha kamharə.

Pwəh nəgnəginiien mīne nisaiien mīne niskaiien haruvehe tukw ik ia nəpīn me.”

5

Kwəti sipsip mīne nīmwai nəkukuə kīnərfe

¹ Nənə iakətoni Iəmə sə raməkure ia jea səvənhi mamərimənu in rauvehi nīmwai nəkukuə riti ia rəgin mwatuk. Nīmwai nəkukuə nāha kīmərai pen nari ia nīkaren pəri mi, nənə kərfe kuvi tərini m sefen. ² Nənə iakətoni agelo riti nəgsen rasori raməgkiari asori mamīni irapw mə, “Sin ratukwatukw mə trejtehi raka nəri me nāha sefen kīməvi tərini nīmwai nəkukuə irə nənə məsevər ia nīmwai nəkukuə?” ³ Mətə iərmama riti riwən ia neiai, uə ia tīprənə, uə ia reri tīprənə, in ratukwatukw mə ko rəsevər ia nīmwai nəkukuə i kīnərfe

4:9: Dan 4:34, 6:26, Dan 12:7, Rev 4:2,10 **4:10:** Rev 4:9, Rev 5:1,7,13, Rev 6:16, Rev 7:10,15, Rev 19:4, 21:5 **5:1:** Rev 4:2,10, Aes 29:11, Esik 2:9-10

mæti pen iræ. ⁴ Nənə rerik rærkwəp̄ir iakasæk t̄i nəri nə mə k̄ipkətoni mhə iərmama riti ratukwatukw mə ko rəsevər ia n̄imwai nəkukuə k̄inərfe mæti pen iræ. ⁵ M̄iregi nəmə asori me nəha irəha riti r̄ini pehe tukw iou mə, “Əpwəh nasəkien. Mətoni ro. Iərmama sə r̄iməkupwən ia kwənək̄wus səvəi Kig Tevit, kani nəgh̄in mə ‘Laeon səvəi Juta,’ in ruvəskai raka meste naruagənien rukurau. Ro pen in rukurən nuvehien n̄imwai nəkukuə nəha k̄inərfe kuvi tərini m sefen məsevər iræ.”

⁶ Nənə iakəti pen mətoni kwəti sipsip riti ramərer ipaka t̄i jea səvəi Iəmə nəha raməkure mamərimənu ia kurkwai n̄ərim̄iru me nəha kefə m̄ine nəmə asori me nəha twenti-fo. Kwəti sipsip nəha iakətə rəmwhen mə k̄inousi əpune raka. Kənkəpati sefen, nənə, nukwai nənimen sefen. Nukwai nənimen me nəha irəha nəha nən̄imw̄in me nəha sefen səvəi Kumwesən in r̄inərhi pen irəha həuvən ia kwopun me ia təkure t̄iprənə. ⁷ Nənə kwəti sipsip nəha revən t̄i Iəmə sə raməkure ia jea səvənhi mamərimənu, muvehi raka n̄imwai nəkukuə nəha k̄inərfe ia rəgin mwatuk. ⁸ Nəp̄in ruvehi n̄imwai nəkukuə nəha k̄inərfe, nənə n̄ərim̄iru me nəha kefə m̄ine nəmə asori me nəha twenti-fo hən̄imwi nukurhunraha m̄heiwaiu ia nəmri kwəti sipsip. Irəha pam kamhəuvehi nəri kauəsi kaməni n̄ipu irə, mamhəuvehi mwi pesin me kino ia kol. Pesin me nəha kamhəuvehi həukuər ia n̄imwəkmwəki nari kauvani n̄ipekin rapein amasan. Nise napw irə rəmwhen ia nəfwakiien me səvəi nərmama me

5:5: Jen 49:9, Aes 11:1,10, Rev 22:16 **5:6:** Sek 4:10, Jon 1:36, Rev 1:4, 5:12, Rev 13:8 **5:7:** Rev 4:2,10 **5:8:** Rev 8:3-4, 14:2, Rev 15:2, Sam 141:2

səvəi Kumwesən. ⁹ Irəha kamhoskafə ia nīpu vi riti, mamhəni mə,
 “Ratukwatukw mə ik tikuvehi nīmwai nəkukuə i kinərfe,

nənə məsevər irə.

Ik ikəmwhen ti nəri nə mə kinousi əpune ik,

nənə nitem sə rīnaiu ikuvehi nəmri nərmama me irə, irəha səvəi Kumwesən.

Irəha nərmama səməme haməuku pen ia kwənəkwas me pam, mine nəgkiariien me pam, mine teki nərmama me pam, mine tənəmtənə me pam.

¹⁰ Ik ikino irəha həuvehe mhəmwhen ia kig me mine pris me ia nəmri Kumwesən səkimaha,

nənə irəha tuhərimənu ia tīprənə.”

¹¹ Nənə iakəti pen mīregi reri nagelo me həpik həpik. Irəha kamhərer kuraukurau ia Iəmə sə raməkure ia jea səvənhi mamərimənu, mine nərīmīru me, mine nəmə asori me. Nagelo me nəha irəha taosen m taosen uə ten-taosen m ten-taosen, ¹² kamhoskafə əpwəmwis, mamhəni mə,
 “Kwəti sipsip sə kinousi əpune, in ramasan pik.

Pwəh nīskaiien, mine nautə, mine nukurənien, mine nərīmənuien, mine nīsiaiien, mine nasoriien, mine nəgnəginiiien həuvən tukwe in ia nəpīn me.”

¹³ Nənə iakregi narimnari me pam səməme Kumwesən rīno ia neiai, ia təkure tīprənə, ia reri tīprənə, ia reri təsi, iakregi narimnari me

5:9: Sam 33:3, 40:3, Sam 96:1, 98:1, Sam 144:9, Rev 14:3 **5:10:** Eks 19:6, Aes 61:6, Rev 1:6, 20:6, Rev 22:5 **5:11:** Dan 7:10, Hip 12:22 **5:12:** 1Kron 29:11, Rev 5:6 **5:13:** Rev 4:2,10

pam sɛmɛme kamharə ia kwopun me nəha kamhoskafə, mamhani nɪpu mə,
 “Iəmə sə raməkure ia jea sɛvənhi mamərimənu
 mine kwəti sipsip,
 pwəh nəgnəginiiien, mine nisaiien, mine na-
 soriiien, mine niskaiien, həuvən tɪ nirau ia
 nuk nuk me.”

¹⁴ Nənə nərimiru me nəha kefə həni mə, “Pwəh ro iamɪnhi!” Nənə nəmə asori me hənimwi nukurhunraha mheiwaiu, mhəuvei pen nisaiien sɛvənraha minrau.

6

Kwəti sipsip rəsevər ia nimwai nəkukuə sə kinərfe

¹ Ia nəpɪn nəha iakəti pen mətoni kwəti sipsip reitehi raka nəri nəha riti sə kiməvi tərini nimwai nəkukuə irə. Meitehi raka pam, nənə iakregi nərimiru me nəha kefə riti rəgkiari rərɪn rupwinari rəmwhen ia karuəruə mɪni mə, “Uvehe!”

² Nənə iakəti pen mətoni hos əpsan riti. Iəmə sə raməkure irə rauvehi nɪfagə. Kuvei pen kəfəfau sɛvəi nisaiien min. In rier mamevən rəmwhen iərmama riti sə rɪnaruaɡən pam, nənə traruagən mwi muvehi irapw niskaiien sɛvəi nərməpə.

³ Nənə kwəti sipsip reitehi raka nəri sə ro kəru irə kiməvi tərini nimwai nəkukuə irə. Meitehi raka pam, nənə iakregi nərimiru me nəha kefə sə ro kəru irə rɪni mə, “Uvehe!” ⁴ Nənə hos riti mwi ruvehe hos əruerəv. Iərmama sə raməkure irə kuvei pen nau asori riti sɛvəi naruaɡənien min. Kinəsəni in mə trevən mo nərmama ia təkure tɪprənə haruaɡən mhousi əpune irəha me.

⁵ Nənə kwəti sipsip reitehi raka nəri sə ro kahar irə kıməvi tərini nımwai nəkukuə irə. Meitehi raka pam, nənə iakregi nərımıru me nəha kefə sə ro kahar irə rini mə, “Uvehe!” Nənə iakəti pen mətoni hos pitəv riti. Iərmama sə raməkure irə rauvehi nəri sə kaməkiri nari irə. ⁶ Nənə iakregi reri iərmama riti ruku pen ia kurkwai nərımıru me nəha kefə, mamini mə, “Evən. Kinəseni ik mə tiko nukumhə ravən ia tənəmtənə me. Nərmama tuhərarki mane asori ti nuvehien nəveginien rouihi a. Mətə tikəpwəh nourahaien nukune nei me nəha olif kamo oel ia nukwan mine nukune nəkwus me nəha krep kamo waen irə.”

⁷ Nənə kwəti sipsip reitehi raka nəri sə ro kefə irə kıməvi tərini nımwai nəkukuə irə. Meitehi raka pam, nənə iakregi nərımıru me nəha kefə sə ro kefə irə rini mə, “Uvehe!” ⁸ Nənə iakəti pen mətoni hos əmrakw riti. Iərmama sə raməkure irə nəghin nə Noien Iərmama Remhə. In riti nəghin nə Imwei Nəkur Həuvamhə rakurirə irə rauevən. Kinəseni pen nərmama pam ia təkure tıprənə ia rəginrau. İrau troueven rouəvsini irəha kefə kefə, rouo kua-tia remhə rouəpwəh kahar kamharımıru. Nepwın tuhemhə ia naruağənien. Nepwın nəveginien triwən ti nirəha hemhə. Nepwın nemhəien truvehi irəha hemhə. Nepwın nəri əprmin me tuhahi əpune irəha.

⁹ Nənə kwəti sipsip reitehi raka nəri sə ro krirum irə kıməvi tərini nımwai nəkukuə irə. Meitehi raka pam, nənə iakəti pen fwe nisui nıfatə pi-rapw mətoni nərmama səməme kinousi əpune irəha ti nəri nə mə kamhəni irapw nəgkiariien

səvəi Kumwesən, mamhəni mə in ro nīpərhiēnien.

¹⁰ Irəha kāmhəkwein əpwəmwis mə, “Iərimənu asori. Ik Iəmə ikinan. Ik nīpərhiēnien. Nərmama ia təkure tīprənə hənousi əpune kīmaha. Ikafwini mə tinesən ikərpwīn pen noien ərəha səvənraha?”

¹¹ Irəha həni iamīnha irə, nənə kuvei pen tinari əpsan mīnraha kuatia kuatia, kīni pen ti nīrəha i mə tuhapwis ouihī a mwi meste tukukupwən kousi əpune pam piəvnraha me nepwīn mwi səməme hənamo tukwini pəri nari irəha mīnraha fwe kupwən.

¹² Nənə kwəti sipsip reitehi raka nəri sə ro sikis irə kīməvi tərini nəkukuə irə. Meitehi raka pam, nənə iakəti pen mətoni nīmwnīmwiēn asori riti ravən. Meri ruvehe mīpitəv mīpitəv. Məkwə ruvehe məruerəv rəmwhēn ia netə. ¹³ Nənə kəməhau me fwe irənhə ia neiāi həsas mheiwaiu ia tīprənə rəmwhēn ia nei riti nīmətāgi asori rīkiukiū irə nukwan me həsas. ¹⁴ Kəpuapen ruvehe miwən məmwhēn ia nīmwai nəkukuə iərmama ruvehi mərfē raka i. Nənə təkūər me mīne tənə əmweris me haraka ia təmwhəkīnraha me.

¹⁵ Nənə kīg me ia tīprənə, mīne iēni me, mīne nəmə asori me səvəi naruağən me, mīne nərmama nautə səvənraha rasori, mīne nərmama nəgsenraha rasori, irəha mīne nərmama pam nəri auər a mə irəha slef uə həpko mhə irəha slef, həuvən ia təkūər me mhərkwafə ia nīpəgi kəpwier me mīne reri kəpwier me, ¹⁶ mamhəkwein pen

6:10: Rev 16:7, Dut 32:43, Sam 79:10 **6:11:** Rev 3:18, 7:9,13, Rev 19:14 **6:12:** Mat 24:29, Wok Me 2:20, Rev 8:12 **6:13:** Aes 34:4 **6:14:** Aes 34:4, Rev 16:20 **6:15:** Aes 2:10,19,21 **6:16:** Luk 23:30, Rev 4:2,10

täkuär me mine kəpwier me mamhəni mə, “Tiho mhəsas mhəkure tərini kimaha, mhərkwafə kimaha, pwəh iəmə nəha raməkure ia jea səvənhi mamərimənu rəpwəh nətoniien kimaha, pwəh niemaha səvəi kwəti sipsip rəpwəh nesteien kimaha. ¹⁷ Kwa nəp̄in asori səvəi niemaha səvənrau ruvəuvehe. Sin nəghin ko rərer irapw?”

7

Agelo rəmri pen mak səvəi Kumwesən ia nəkur Isrel irəha pam 144,000

¹ Kurirə ia narimnari me i iakətoni nagelo me kefə kəmhərer ia təkure t̄iprənə i riti ia n̄ikaren pesu, riti ia n̄ikaren parei, riti ia n̄ikaren prehi, riti ia n̄ikaren peraha. Irəha kəmhəkwtəmhiri n̄imətagi me pam nəha kefə mə n̄imətagi triwən ia təkure t̄iprənə mine təsi mine nei me. ² Nənə iakəti pen mətōni agelo riti mwi ruku peraha mauvehi nari riti tromak ia n̄ərmama irə trahatən pen mə Kumwesən sə ramiru səvənhi me n̄ərmama me nə irəha. Agelo i rəkwein əpwəmwis nagelo me nəha kefə səməme kinəsəni irəha mə tuhouraha t̄iprənə mine təsi. ³ In r̄ini pen t̄i n̄irəha i mə, “Həpəp̄im narakaien n̄imətagi pwəh rəpwəh nourahaien t̄iprənə mine təsi mine nei me. Pwəh iako pen raka mak səvəi Kumwesən səkitaha ia n̄ipwənai iotukwininari me səvənhi me.” ⁴ Nənə iakregi k̄ini n̄ərmama me nəha səməme həuvehi mak səvəi Kumwesən irəha pam wan-hantret-fotifo-taosen. N̄ərmama me nəha komak ia n̄irəha

6:17: Joel 2:11, Neham 1:6, Mal 3:2 **7:1:** Jer 49:36, Dan 7:2

7:3: Esik 9:4,6, Rev 9:4 **7:4:** Rev 14:1,3

hæuku pen pam ia kwənəkwus me səvəi nəkur Isrel.

⁵ Ia kwənəkwus səvəi Juta, nərmama irəha pam twelef-taosən.

Ia kwənəkwus səvəi Rupen, nərmama irəha pam twelef-taosən.

Ia kwənəkwus səvəi Kat, nərmama irəha pam twelef-taosən.

⁶ Ia kwənəkwus səvəi Aser, nərmama irəha pam twelef-taosən.

Ia kwənəkwus səvəi Naftali, nərmama irəha pam twelef-taosən.

Ia kwənəkwus səvəi Manase, nərmama irəha pam twelef-taosən.

⁷ Ia kwənəkwus səvəi Simeon, nərmama irəha pam twelef-taosən.

Ia kwənəkwus səvəi Livae, nərmama irəha pam twelef-taosən.

Ia kwənəkwus səvəi Isakar, nərmama irəha pam twelef-taosən.

⁸ Ia kwənəkwus səvəi Sepulun, nərmama irəha pam twelef-taosən.

Ia kwənəkwus səvəi Josef, nərmama irəha pam twelef-taosən.

Nənə, ia kwənəkwus səvəi Penjamin, nərmama irəha pam twelef-taosən.

Nərmama həpik tinari səvənraha rəpsan

⁹ Kurirə ia narimnari me i iakəti pen mətoni nərmama həpik ko kəpkəvsini pam mhə irəha. Irəha haməuku pen ia tənəmtənə me pam, mine kwənəkwus me pam, mine teki nərmama me pam, mine nəgkiariien me pam. Kamhərer ia nəmri Iəmə sə raməkure ia jea səvənhi mamərimənu

mīne ia nāmri kwāti sipsip. Irəha kamharkahu tīnari əpsan me, mamhəuvehi nīmwai nāmwiṛ me ia rəginraha, ¹⁰ mamhəkwein əpwəmwis mamhəni mə,

“Kumwesən səkimaha sə raməkure ia jea səvənhi mamərimənu irau kwāti sipsip, irau nəha krino suatuk ti nuvehimiruien kitaha!”

¹¹ Nagelo me pam hərer kuraukurau ia jea Kumwesən raməkure irə mamərimənu, nənə, mhərer kuraukurau mwi ia nəmə asori me, mīne nərimiru me nəha kefa. Nənə irəha hənimwi nukurhunraha kupwən ia jea səvəl Kumwesən, mheiwaiu nənimenraha rirapi tīprənə, nənə, mamhəsiəi in, ¹² mamhəni mə,

“Pwəh ro iamīnhi!”

Pwəh nini viviiēn, mīne nəgnəginiiēn, mīne nukurənien, mīne tanak, mīne nisiiāien, mīne nərimənuuiēn, mīne niskaiēn, həuvən ti Kumwesən səkitaha ia nuk nuk me. Pwəh ro iamīnhi!”

¹³ Nənə nəmə asori me nəha riti ia nirəha rəres iou mə, “Nisimə nəha kamharkahu ia tīnari əpsan me? Irəha haməuku pəku?”

¹⁴ Miregi iakini mə, “Iəmə asori. Ik a ikukurən.”

Miregi rini mə, “Irəha nərmama me nəha səməme kamhəier ia nəpīn nəha kiməni mə truvehe nərmama tuhəregi nəmisəien irə rasori pik anan. Irəha hənaikuas ia tīnari me səvənraha mho həpsan ia nite kwāti sipsip. ¹⁵ Ro pen irəha kamhərer ia nāmri Kumwesən sə raməkure ia jea səvənhi mamərimənu. Irəha həmwhen ia

7:10: Rev 4:2,10

7:12: Rev 5:12, 11:17

7:13: Rev 3:18

7:14: Mat 24:21

7:15: Rev 4:2,10

pris me sāmame kamho tukwini pen nari min
ia nāpin mine ia ran ia nākwai nīmwa sāvēnhi.
Nənə Kumwesən sə raməkure ia jea sāvēnhi
mamərimənu in trəuiui irəha nāpin me pam.

¹⁶ ‘Nukumhə tripkahi mhə mwi irəha.

Irəha tuhəpkəkwa kwakwa mhə mwi.

Nukwəsikər tripkənhi mhə irəha,

uə nāpnāpanien asori sāvəi meri tripkənhi
mhə irəha,

¹⁷ ti nəri nə mə kwəti sipsip nəha ia kurkwai jea
sə Kumwesən raməkure irə mamərimənu in
trətui amasan ti nīrəha rəmwhen iərmama
riti sə ramətui amasan ti sipsip me sāvēnhi.

In triri irəha mhəuvən ti nəmri nuimīru me.

Nənə Kumwesən trirai raka pam nise
nəmri nraha.’ ”

8

*Kwəti sipsip reitehi raka nəri sə ro sefen irə
kīməvi tərini nīmwai nəkukuə irə*

¹ Nāpin kwəti sipsip reitehi raka nəri sə ro se-
fen irə kīməvi tərini nīmwai nəkukuə irə, nənə
kwənamriḡ fwe ia neiai meste nīpəri aoa riti.

² Nənə iakətoni nagelo me nəha sefen sāmame
kamhərer ia nəmri Kumwesən ia nāpin me
kīməpeki pen kisipw kuatia kuatia minraha.

³⁻⁴ Agelo riti mwi nəha ikīn rauvehi nari riti
kīno ia kol. Nəri nəha rukuər ia nīmwəkmwəki
nari kauvani nīpekīn rapein amasan. Kuvei pen
nīmwəkmwəki nari nəha min mə truvani ia təkure
nīfatə nəha kīno ia kol ramərer kupwən ia jea sə

7:16: Aes 49:10 **7:17:** Sam 23:2, Aes 25:8, Jon 10:11, Rev 5:6,
21:4 **8:1:** Hab 2:20 **8:3-4:** Rev 5:8, Eks 30:1-3, Rev 9:13

8:3-4: Rev 5:8

Kumwesən raməkure irə mamərimənu pwəh nise napw irə rousəsımwın irəha nəfwakiien me səvəi nərmama me pam səvənhi. Ro iamınhi irə agelo nəha ruvehe mərer pen ia nifatə nəha, muvani nımwəkmwəki nari nəha rıpık, nənə nise napw irə rousəsımwın irəha nəfwakiien me səvəi nərmama me səvəi Kumwesən, həutə ia nəmri Kumwesən. ⁵ Nənə agelo nəha ruvehi nukumheəv rauək ia təkure nifatə, mərki pen i ia nəri nəha in rauvehi rukuər, mərarki irapw ia təkure tıprənə i, nənə nouapırien rəhiapw, karuəruə rərkwəpahar, kregi nərkərikien, nımwnımwien ravən.

Kisipw me irəha pam sefen

⁶ Nənə nagelo me nəha sefen səməme kamhəuvehi kisipw kamhəpnəpenə ti nəseien kisipw. ⁷ Nagelo me nəha sə kupwən rəse kisipw səvənhi, nənə aes mıne napw mıne netə ho a kərapi irə kətəgi irapw ia tıprənə i. Ruək mahi nıpəri tıprənə, məpwəh nıpərin kəru, nənə mahi nei me nıpərinraha kuatia, məpwəh nıpərinraha kəru, nənə mahi pam nurhi merə me.

⁸ Agelo sə ro kəru irə rəse kisipw səvənhi, nənə nari riti rəmwhen ia təkueər asori rauək kərarki pen ia təmwei təsi. Nənə nıpəri təsi kwatia ruvehe mo netə irə, nıpərin kəru krouamasan. ⁹ Nərimıru me ia təmwei təsi nıpərinraha kuatia hemhə, nıpərinraha kəru kamhəmıru, nənə nıfətə me səməme kamhıu ia təsi ko koeite irəha pam kuai irəha ia kusen kahar harəmnəmwhen a kusen kuatia ruvehe mərəha kəru krouamasan.

8:5: Lev 16:12, Eks 19:16-19, Rev 4:5, 11:19, Rev 16:18 **8:7:** Eks 9:23-26, Esik 38:22, Joel 2:30 **8:8:** Eks 7:20-21

¹⁰ Agelo sə ro kahar irə rəse kisipw səvənhi, nənə kəməhau asori riti rauək rəmwhen ia kwənhia rier raka ia neiai, meiwaiu məsas pen ia nui aris me mine nəmri nui me, mouraha nīpərin riti məpwəh kəru krouamasan a. ¹¹ Kəməhau nəha nəghin nə Nəfiəien. Nui me nəha reste irəha həuvehe mhəfiə. Nənə nərmama həpik hemhə ti nəri nə mə hənimwi nui əfiə.

¹² Agelo sə ro kefə irə rəse kisipw səvənhi, nənə nari riti ro meri mine məkwə mine kəməhau me ro pen həpwəh nuəkien ia nəpin pekın. Ia ran meri rauək ia nīpərin kəru, məpwəh nuəkien ia nīpərin kuatia. Ia nəpin məkwə mine kəməhau me kamhəuək ia nīpərin kəru, məpwəh nuəkien ia nīpərin kuatia.

¹³ Nənə iakəti pen mətoni mīrup riti ramivə irənhə ia nimagouagou. Iakregi ramasək əpwəmwis, mamini mə, “Aueh! Aueh! Aueh! Nagelo mirəhar nəha na tuharəse kisipw me səvənrahar. Trərəha anan tukumiaha nərmama səməme hiamarə ia təkure tīprənə.”

9

¹ Agelo sə ro krirum irə raməse kisipw səvənhi, nənə iakətoni kəməhau riti rukrutə ia neiai mīmwei irapw ia təkure tīprənə. Kiməuvei pen ki riti min. Ki nəha səvəi nəsevərien ia nīpəg sə rameiwaiu nukunen riwən. ² Kəməhau nəha rəsevər ia nīpəg nəha nənə nise napw ruku pen fwe ikin mutə rəmwhen ia nise napw sə rasori pik anan. Meri mine nimagouagou kroupitəv ia nise

8:11: Jer 9:15 **8:12:** Rev 6:12-13 **8:13:** Rev 9:12, 11:14

9:1: Rev 20:1 **9:2:** Jen 19:28, Eks 19:18, Joel 2:2,10

napw sə ruku pen ia nīpəg nəha. ³ Nənə kəmnhəvt me həier raka ia nise napw nəha mheiwaiu ia tīprənə. Kiməuvei pen niskaiien mīnraha mə tuhəpi nərmama ia nīpikinraha, mho nəmisəien mīnraha rəmwhen ia mimi nəha skopion sə ramərkou ia tīprənə. ⁴ Kiməni pen ti kəmnhəvt me i mīnuə tuhəpwəh nourahaien nurhi mīne nei me mīne narimnari me səməme kəmhəuverə ia təkure tīprənə, mətə tuhouraha əpa nərmama me nəha səməme mak səvəi Kumwesən riwən ia nīpwənanraha. ⁵ Kinəsəni irəha mə tuhəpi nərmama mho nəmisəien mīnraha meste məkwə krirum, mətə tuhəpwəh nəpi əpuneien irəha. Nəmisəien nəha tuhəregi rərəha irə rəmwhen ia nəmisəien səvəi mimi nəha skopion nəpīn rəpi iərmama riti. ⁶ Ia nəpīn me nəha nərmama tuhətui suatuk ti nemhəien, mətə ko həpkətoni mhə. Tuhokeikei mə tuhemhə, mətə ko həpkəmhə mhə.

⁷ Kəmnhəvt me nəha, iakətə irəha həmwhen ia hos me kəmhərer mwatuk ti naruagəniēn. Ia nukwənenraha kəfəfau me həmwhen ia kəfəfau səvəi nīsiaiēn kīno ia kol. Nənimenraha rəmwhen ia nəmri nərmama. ⁸ Nukwənenraha rəpwəmwis rəmwhen ia nukwəne pran. Revīnraha rəhiə rəmwhen ia revī laeon. ⁹ Səvənraha karkahu kīno ia aean kəmhəvegi kwənpwenhinraha irə səvəi naruagəniēn. Tərəgīnraha kəmhəpuk pik rəmwhen hos me səməme kəmhəvkəkīni kat me mamhəiu mamhəuvən ti naruagəniēn. ¹⁰ Nīpikinraha ro revīn irə rəmwhen ia nīpiki

9:3: Eks 10:12,15 **9:4:** Rev 7:3 **9:6:** Job 3:21, Jer 8:3, Rev 6:16 **9:7:** Joel 2:4 **9:8:** Joel 1:6 **9:9:** Joel 2:5

mimi nəha skopion. Niskaiien səvənraha tuho nəmisəien m nərmama irə meste məkwə krirum raməmak ia nīpikīnraha. ¹¹ Səvənraha riti nəha ikin iəmə asori ramərimənu ia nirəha. In nə agelo səvəi nīpəg sə rameiwaiu nukunen riwən. Ia nəgkiariien Hipru nəghi agelo nəha Apoton. Ia nəgkiariien Krik nəghin nə Apolion (nīpwran mə Kərietaha).

¹² Aueh! Nərəhaien kupwən ruvehe muvavən. Mətə aueh, aueh, hətə ro! Nərəhaien kəru mi nəha ikin troupuvehe mwi.

¹³ Agelo sə ro sikis irə rəse kisipw səvənhi, nənə iakregi reri iərmama riti ruku pen ia nīpəsegi nīfatə nəha kefə sə kīno ia kol ramərer kupwən ia Kumwesən. ¹⁴ Reri iərmama nəha rəgkiari m agelo i ro sikis irə sə rauvehi kisipw nəha, mīni pen tukwe in mə, “Fi nari ia nagelo me nəha kefə səməme kīnərihi irəha fwe kupwən kamharə fwe nui aris asori nəha Iufretes.” ¹⁵ Ro iamīnhi irə kīfi nari ia nagelo me nəha kefə. Kīnəpnəpenə raka ia nagelo me nəha kamheitenhi aoa nəha, nəpīn nəha, məkwə nəha, mīne nuk nəha, mə tukīfi nari ia nirəha həuvən mhəvsini pam nərmama ia təkure tīprənə, mhəuai irəha ia kusen kahar harəmnəmwhen a, mhousi əpune riti mhəpwəh kəru. ¹⁶ Nənə iakregi kīni mə naruağən me səvənraha səməme kamhəkure ia hos irəha pam tu-hantret-milian.

¹⁷ Ia vison səiou iakətoni hos me nəha mīne nərmama səməme kamhəkure ia hos me. Irəha harkahu ia tīnari səvəi naruağənien kīno ia aean, mhəvegi kwənpwenhīnraha irə. Tīnari me nəha

rærueṛəv, mo plu, makwes. Kənkəpwə hos me nəha həmwəhen ia kənkəpwə laeon me. Napw mīne nise napw mīne təpisi ərəha kamharuku pen ia nīpəgi nəkwənraha mamharier¹⁸ mharousi əpune pam nərmama ia tənəmtənə me ia kusen kuatia mharəpwəh kusen kəru. ¹⁹ Niskaiien səvəi hos me nəha in nəha ia nīpəgi nəkwənraha mīne nīpikinraha, ti nəri nə mə nīpikinraha rəmwəhen ia snek sə ro kənkəpwə ia nusvenhin. Ia nīpikinraha me ho nəmisəien m nərmama.

²⁰ Mətə nərmama me i səməme nərpwinien mirəhar nəha harəpwəh nousi əpuneien irəha, irəha həpkəpwəh mhə kumwesən eikuə me nəha həno ia rəginraha. Irəha kamhəmwur pen a mamhəfwaki pen m nəremhə me mīne nənimwi nari me səməme kino ia kəruətərei mīne nei, kino mwi ia aean me i kol, silva, mīne pras. Irəha nənimwi nari me a. Həpkətoni mhə nari, mhəpkregi mhə nari, mhəpkavən mhə. ²¹ Nərmama me i həpkəpwəh mhə noien ərəha me nepwin mwi səvənraha. Mətə kamhəmwur pen a mamhousi əpune nərmama, mamho nahak mīne noien səvəi klepa, mamhakres, irəha nərman mīne nīpran kamhəiri əpnəpen irəha me.

10

Agelo sə rauvehi kwəti nimwai nəkukuə riti kinərfe

¹ Nənə iakətoni agelo riti mwi nəgsen rasori rukrutə ia neiai meiwaiu pehe. Nəpuə riti ruvegi nīpwrən. Mərarən riti rukuraukurau ia

kənkəpʷə. Nənimen raməhiapw rəmwhen ia meri. Nisun mi krouəmwhen ia pos asori mi krauuək. ² Kwəti nīmwai nəkukuə riti sə kinərfe raməmak ia rəgin. In ruvi atukw i, mərpwi pəri nisun mi mwatuk ia təsi nənə nīkaren mour ia tīprənə, ³ marə məkwein əpwəmwis, rerin rəmwhen ia laeon sə ramasək asori. Nəpin rəkwein iamīnhi, karuəruə rərkwəpahar m sefen. ⁴ Karuəruə rərkwəpahar raka m sefen, iakəpnəpenə mə takrai pen ia nəkukuə nəgkiariien sə rani, mətə iakregi reri iərmama riti rukrutə ia neiai mamini mə, “Ərkwafə ia nəgkiariien i karuəruə rani, məpwəh nīrai penien ia nəkukuə.”

⁵ Nənə agelo sə iakətoni ramərer pen ia təsi mine tīprənə ruvehi utə rəgin mwatuk mahatən pen fwe ia neiai, ⁶ mīni mə, “Kumwesən ramarə ia nuk nuk me. In rino neiai, tīprənə, təsi, mine narimnari me pam səməme kamharə ia nīrəhar. Iakani kwəsua hi ia nəghin mə nəpin ruvəkwa kwa. Kumwesən ko rīpkəfwini mhə mwi, ⁷ mətə nəpin agelo sə ro sefen irə trəse kisipw səvənhi, nəgkiariien nəha Kumwesən rīnərkwafə nīpwrān truvehē mukuə rosi in rīmāni pen tī iotukwininari me səvənhi profet kupwən me.”

⁸ Nənə iakregi mwi reri iərmama nəha ruku pen ia neiai mani pehe tukw iou i mə, “Evən muvehi nīmwai nəkukuə nəha sə kinərfe raməmak ia rəgi agelo nəha ramərer pen ia təsi mine tīprənə.”

⁹ Ro iamīnhi irə iakevən mərəs pen agelo nəha mə truvei pehe miou nīmwai nəkukuə ouihi nəha

10:4: Dan 8:26, Dan 12:4,9 **10:5:** Dut 32:40, Dan 12:7 **10:6:** Neh 9:6, Sam 146:6 **10:7:** Dan 9:6,10, Amos 3:7 **10:9:** Esik 2:8; 3:1-3

sə kinərfe. In rini pehe tukw iou i mə, “Tikuvehi məni. Trouaha tipwim, mətə ia nəkwam tikregi rəsien rəmwhen ia sukapak.” ¹⁰ Nənə iakuvehi raka nimwai nəkukuə ouihī nəha sə kinərfe ia rəgi agelo, məni. Iakaməni mīregi ia nəkwak rəsien rəmwhen ia sukapak, mətə nəpīn iakətīgai pam, nənə iakregi tipwīk ruvehe mərəha. ¹¹ Nənə kini pehe tukw iou i mə, “Tikaməkeikei məgkiari mwi rəmwhen ia profet, mīni irapw nəfe treste nərmama həpīk, nərmama ia teki nərmama səpəmsəpə, mīne kwənəkwus me səpəmsəpə, mīne nəgkiariien me səpəmsəpə, mīne kīg me.”

11

Iəmə mi kəru krouərer irapw ti nəgkiariien pərhiēn

¹ Ia nəpīn nəha kuvei pehe nari riti miou rəmwhen ia nig kauvehi mak səvəi nari irə, nənə kini pehe tukw iou i mə, “Evən muvehi mak səvəi nimwə səvəi Kumwesən mīne nīfatə səvənhi, məvsini nərmama səməme kamhəfwaki fwe ikin. ² Mətə tikəpwəh nuvehiiēn mak ia nīkare nimwə nəha iruə. Tikəpwəh nuvehiiēn mak səvənhi, ti nəri nə mə kuvəuvei pen raka kwopun nəha m nərmama hərəirei Kumwesən,^a nənə irəha tuheivə testesi taon ikinan səvənhi meste məkwə foti-tu.” ³ Iou takərhi pen iərman mi kəru səiou səməmi krouərer irapw tukw iou. Iəmə mi nəha trouarkahu tinari sə rahatən pen

11:1: Esik 40:3, Sek 2:1-2 **11:2:** Luk 21:24, Rev 12:6, 13:5

^a **11:2:** Nərmama hərəirei Kumwesən. Suatuk riti mwi ti nīnīien nəgkiariien nəha in i mə “Nərmama ia tənəmtənə me” uə “Nərmama rīpko mhə irəha nəkur Isrel.”

mə krauasək ti nərəhaien, nənə rouarə rouəvisau irapw nəgkiariien sə takuvei pen minrau meste nəpɪn irəha pam wan-taosen tu-hantret-sikisti. ⁴ Irau nəha nukune nei mi olif, mine nəri mi laet raməkure utə ia nirau səməmi krouərer ia nəmri Kumwesən Iərimənu səvəi tɪprənə. ⁵ Trini minuə iərmama riti raməmwur mə trouraha irau, nənə nərami napw truku pen ia nɪpəgi nəkwanrau mier mahi əpune nərmama səməme haməmwəki irau. Iərmama sə raməmwur mə trouraha irau traməkeikei memhə iamɪnha irə. ⁶ Iəmə mi nəha krauvehi nɪskaiien ti nəsisəgien ia nəpuə mə nesən trəpwəh nauərien nəpɪn irau krauni irapw nəgkiariien me səvəi Kumwesən. Irau krauvehi mwɪ nɪskaiien ti nuvsiniien nui me həuvehe mho netə ia nɪrəha, nənə rouukurən mwɪ nuvehi peheien nemhəien me səpəmsəpə həuvehe mhouraha nərmama ia təkure tɪprənə i. Irau krouukurən noien narimnari me nəha ia nəpɪn me a rəmwhen mə irau kraukeikei.

⁷ Nəpɪn irau krouni irapw pam raka nəgkiariien səvənrau, nənə nərimɪru fwe ia nɪpəg sə rameiwaiu nukunen riwən, in trukrirapw mutə maruagən minrau, muvehi irapw nɪskaiien səvənrau, mousi əpune irau. ⁸ Nɪpwranrau mi trouəmak ia sutuk səvəi taon asori nəha, kwopun nəha kɪnərui tərini pen Iərimənu səvənrau ia nei kamarkuau ikin. Kɪməuvsini nəghi taon nəha kɪni mə “Sotom” uə “Ijip” ramahatən pen nərəhaien ia kwopun nəha. ⁹ Nənə nərmama səməme haməuku pen

11:4: Sek 4:3,11-14 **11:5:** 2Saml 22:9, 2King 1:10, Sam 97:3, Jer 5:14 **11:6:** 1King 17:1, Eks 7:17-20, 1Saml 4:8 **11:7:** Dan 7:21, Rev 12:17, Rev 13:1,7, 17:8 **11:8:** Luk 13:34

ia teki nǎrmama me sǎpǎmsǎpǎ, mǎne nǎgkiariien me sǎpǎmsǎpǎ, mǎne kwǎnǎkwus me sǎpǎmsǎpǎ, tuhǎspau ia nǎpwrǎnrau meste nǎpǎn kahar mǎne nǎpǎrǎn, nǎnǎ, kǎpkǎseni mhǎ nǎpwrǎnrau mǎ tukǎnimwi. ¹⁰ Nǎrmama me ia tǎkure tǎprǎnǎ tuhagien pǎri, mhǎ lafet, mhǎriari pen narimnari amasan me mǎnraha me, tǎ nǎri nǎ mǎ profet kǎru nǎha sǎmǎmi krǎno nǎmisǎien asori m nǎrmama ia tǎkure tǎprǎnǎ krouvamhǎ.

¹¹ Mǎtǎ nǎpǎn kahar mǎne nǎpǎrǎn ruvehe mukurau, nǎnǎ iakǎtoni Kumwesǎn ruvei pen nǎmiruien mǎnrau kroueiahag mwi rouǎrer ia nisunrau. Nǎnǎ nǎrmama me pam sǎmǎme hǎtoni irau hǎhekir asori. ¹² Nǎnǎ irǎha hǎregi reri iǎrmama riti rupwinari ruku pen ia neiai mǎni pen tǎ nirau i mǎ, “Rouutǎ pehe i.” Nǎnǎ nǎpuǎ riti ruvehi irau mutǎ mevǎn ia neiai. Nǎrmama sǎmǎme kamhǎmwǎki irau kamhǎrer mamhǎtoni irau krautǎ.

¹³ Ia nǎpǎn nǎha tǎkwtǎkwuni a mwi nǎmwnǎmwien asori riti ravǎn, makiǎ fifi nari ia kwopun kuatia ia taon nǎha, mǎpwǎh kwopun naen hamasan. Nǎmwnǎmwien ravǎn nǎrmama sefen taosen hemhǎ. Nǎrmama me pam sǎmǎme hǎpkemhǎ mhǎ hǎhekir mhǎtǎmnǎmwǎn, mhǎuvehi utǎ nǎghi Kumwesǎn sǎ ramarǎ ia neiai.

¹⁴ Aueh, nǎrǎhaien sǎ ro kǎru irǎ ruvehe muvavǎn! Mǎtǎ aueh, hǎtǎ ro, nǎrǎhaien sǎ ro kahar irǎ tripko mhǎ tui ruvehe!

Agelo sǎ ro sefen irǎ rǎse kisǎpw sǎvǎnhi

15 Agelo sə ro sefen irə rəse kisipw səvənhi, nənə iakregi nərmama nepwɪn fwe ia neiai kamhəgkiari rerɪnraha rupwɪnari mamhəni mə, “Nərimənuien kamərimənu irə ia təkure tɪprənə i təkwtəkwni ruvehe məmak ia rəgi Kumwesən səkitaha mine Kristo səvənhi.

Nənə in trərimənu ia nuk nuk me.”

16 Nənə nəmə asori me nəha twenti-fo səməme kamhəkure ia jea me səvənraha ia nəmri Kumwesən hənimwi nukurhunraha mheiwaiu, mhəuvei pen nisaiien səvənraha revən tukwe, 17 mamhəni mə,

“Iərimənu Kumwesən sə rauvehi niskaiien me pam.

Ik ikinarə fwe kupwən muvehe meste mwi ipwet mine.

Kimaha iahaməni tanak tukw ik, ti nəri nə mə ikiməuvehi niskaiien asori səim, nənə minamərimənu nəha təkwtəkwni.

18 Nərmama ia tənəmtənə me niemaha rəpi pik irəha, mətə niemaha asori səim ruvəuvehe.

Rino nəpɪn səim tikəkiri nərmama səməme həuvamhə,

mərəku pen səim iotukwininari me, profet me mine nəkur ikinan me, mine nərmama me pam səməme kamhəsiai nəghim,

nəri auər a mə irəha kamhəuvehi nasoriien uə həpkuvehi mhə nasoriien.

Nənə rino nəpɪn səim tikouraha nərmama me nəha səməme kamhouraha nari ia təkure tɪprənə.”

11:15: Eks 15:18, Sam 10:16, Dan 2:44, Obad 21 **11:16:** Rev 4:4,10 **11:17:** Rev 1:4,8, 15:3 **11:18:** Sam 2:1, 46:6, Rom 2:5, Rev 10:7, 19:5, Sam 115:13

19 Ia nāpīn nāha kasevār ia nimwə səvəi Kumwesən fwe irānhə ia neiai. Ia nəkawai nimwə nāha kətoni pokis səvəi nəkīariien i Kumwesən rīnərihi tərini əknekīn. Nənə nouapīrien rəhiapw, karuəruə rəkwəpahar, kregi nəkəkīkīen, nīmwnīmwiēn ravən, aes rəsas rəmwhen ia nesən asori.

12

Pran riti mine snek asori riti

¹ Nənə kətoni nīmtətien asori riti rier irapw fwe ia nīmagouagou. Pran riti rarkahu ia meri rəmwhen ia tīnari səvənhi, mərpwi utə nīsūn mi ia məkʷə, nənə məfəfau ia kəfəfau riti səvəi nīsiaiien kīno pen kəməhau twelef irə. ² Prən nāha ramregi nəmīsaiēn mamasək əpwəmwīs ti nəri nə mə rīno tīpwīn na trərəhi tīni. ³ Nənə nīmtətien riti mwi rier irapw ia nīmagouagou. Iakətə snek asori riti rərueəv. Kənkəpwə irəha pam sefen. Kənkəpati irəha pam ten. Nənə kəfəfau pen kəfəfau səvəi nīsiaiien ia kənkəpwə me. ⁴ Nīpikīn reiesi raka kuse kəməhau riti məpwəh kusen kəru. Səməme nāha nīpikīn reiesi raka irəha həsas ia təkure tīprənə. Nənə snek asori nāha revən mərəer kupwən ia pran nāha na trərəhi iəkunouihi mə nāpīn tīni trətui snek asori nāha trəni. ⁵ Prən nāha rərəhi tīni iərman. In iərman sə truvehi nəri skai rəmwhen ia nep ramahatən pen nasoriien səvəi kīg, rauvehi māməimənu ia nərmana ia tənəmtənə me pam. Nāpīn tīni prən nāha rīnətui raka, nənə Kumwesən ruvehi in, muvehi utə irānhə ia jea

11:19: Hip 9:4, Rev 8:5, 15:5, Rev 16:21 **12:2:** Maeka 4:10

12:3: Dan 7:7 **12:5:** Sam 2:9, Rev 19:15

səvənhi mə trərimənu. ⁶ Nənə prən nəha rap mevən fwe kwopun akwesakwes. Kwopun riti fwe ikin Kumwesən rinəpnəpenə raka ti prən nəha mə trarə ikin. Tukətui amasan tukwe ia kwopun nəha keste nəpən wan-taosən tu-hantret-sikisti.

⁷ Nənə naruagənien riti riskəmter fwe ia neiai. Mikael mine nagelo me səvənhi kənamhousi snek asori, nənə snek asori mine nagelo me səvənhi kənamhousi mwi irəha. ⁸ Mətə Mikael mine nagelo me səvənhi həuvehi irapw niskaiien səvəi snek asori. Kwopun riti səvənraha riwən mwi fwe ia neiai. ⁹ Kuvehi snek asori nəha kərarki irapw pehe ia təkure tīprənə. In snek tui kani mə İəremhə uə Setan sə rameikuə ia nərmama ia tənəmtənə me pam. Kərarki irapw in irəha nagelo me səvənhi heiwaiu ia təkure tīprənə.

¹⁰ Nənə iakregi İərmama riti fwe ia neiai rerin rupwinari, mini mə,
 “Təkwtəkwni nəha Kumwesən səkitaha truve-
 himiru kitaha!
 Təkwtəkwni nəha in tro sətoni mə in rauvehi
 niskaiien, nənə, təkwtəkwni nəha in
 ramərimənu!
 Nənə təkwtəkwni nəha Kristo səvənhi tro sətoni
 mə in rasori ia narimnari me pam!
 Ro iamınhi irə ti nəri nə mə Setan sə rani ərəha
 piəvtaha me ia nəpən mine ia ran ia nəmri
 Kumwesən,
 kınərarki irapw in ia neiai.

¹¹ Piəvtaha me hənaruagən raka irəha min,
 mhəuvehi irapw niskaiien səvənhi ia nite
 kwəti sipsip,

mhəuvehi irapw mwi niskaiien səvənhi ti nəri
 nə mə həni irapw nəgkiariien pərhiēn.
 Irəha həpkokeikei p̄ik mhə nimiruiēn
 səvənraha,
 mətə hənərer mwatuk a ti nemhəien.

¹² Ro iam̄inhi irə, ik neiai m̄ine nərmama səməme
 kamharə ia niram tiho mhagien!

Mətə aueh ik t̄iprənə m̄ine təsi! Tirouregi rərəha
 anan ti nəri nə mə Setan r̄ineiwaiu pehe
 tukumirau!

Niemaha raməpi p̄ik in ti nəri nə mə rukurən mə
 nəp̄in səvənhi ruvəkwakwa.”

¹³ Nəp̄in snek asori nəha rətoni mə kinərarki
 irapw in ia təkure t̄iprənə, nənə r̄inaripwi prən
 nəha sə r̄inərəhi tini iərman. ¹⁴ Mətə kuvei pen
 tərəgi mirup kəru m prən nəha mə trivə irə mevən
 fwe imwəni ia kwopun akwesakwes. Tukamətui
 amasan tukwe ia kwopun nəha keste nuk kahar
 m̄ine n̄ipər̄in mə snek asori trəpwəh nourahaiēn
 in. ¹⁵ Snek asori nəha r̄iruai nui asori riti ia tərhun
 rəmwhen ia iapiwən mə trukurirə pen prən nəha,
 muvehi map. ¹⁶ Mətə t̄iprənə rasitu ia pran nəha,
 meitehi, mət̄igai pam nui sə snek asori ruvərui irə
 ia tərhun. ¹⁷ Ro pen snek asori niemaha rəpi anan
 ti pran nəha. In rəpwəh in mevən mə traruagən
 irəha kwənəkwus me nepw̄in səvənhi. Irəha nəha
 nərmama səməme kamho nəgkiariien me səvəi
 Kumwesən m̄ine nəgkiariien Iesu r̄iməni irapw mə
 ro n̄ipər̄hiēn. ¹⁸ In revən mərəer ia n̄ikare təsi.

12:12: Aes 44:23, Aes 49:13
 Rev 11:7, 14:12

12:14: Dan 7:25, 12:7

12:17:

13

Nərimiru riti sə rukrirapw ia reri təsi mutə

¹ Iakətoni nərimiru riti rukrirapw ia reri təsi mutə. Kənkəpati me irəha pam ten. Kənkəpwə me irəha pam sefen. Nənə kəfəfau pen kəfəfau səvəi nisaiien ia kənkəpati me. Kimərai pen nəhag me ia kənkəpwə me kuatia kuatia, nəhag me səməme kamhəni ərəha Kumwesən. ² Nərimiru nəha rəmwhen ia pusi asori nəha kani mə lepet. Nisun me həmwhen ia nərimiru nəha kani mə pea. Nipəgi nəkwən rəmwhen ia nipəgi nəkwai laeon. Nənə snek asori nəha ruvei pen niskaiien səvənhi min. In ruvei pen mwi jea sə in raməkure irə mamərimənu mine nasoriien sə rasori m nərimiru nəha. ³ Kənkəpwə nərimiru nəha riti iakətoni mə kinəpi əpune raka, mətə rarə mīmuru mwi təmwki nau ruvehe minamə. Nərmama me pam ia təkure tīprənə nənimenraha rier tukwe, nənə həkurirə nərimiru nəha. ⁴ Irəha pam hənimwi nukurhunraha ia nəmri snek asori, mhəsiai in, ti nəri nə mə in ruvei pen nasoriien səvənhi m nərimiru nəha. Irəha hənimwi mwi nukurhunraha ia nəmri nərimiru nəha, mhəsiai in, mhəni mə, “Sin rəmwhen ia nərimiru nəha? Sin rukurən naruağənien irau min?”

⁵ Kinəsəni nərimiru nəha minuə trəgkiari ərpwi mini ərəha Kumwesən. Kiməuvei pen nasoriien min in rukurən noien nəfe nəğhın in rokeikei mə tro meste məkwə foti-tu. ⁶ In rani ərəha pik Kumwesən, mine nəğhın, mine imwəni fwe ia neiai, mine nərmama səməme kamharə ikın.

⁷ Kínəsēni in mə traruagən irəha nərmama me səvəi Kumwesən muvehi irapw niskaiien səvənraha. Nənə kiməuvei pen mwi nasorrien min mə trərimənu ia nərmama me pam, nərmama səvəi kwənəkwus me pam, mine teki nərmama me pam, mine nəgkiariien me pam, mine tənəmtənə me pam.

⁸ Nərmama me pam ia təkure tīprənə səməme nəghinraha riwən ia nəkukuə səvəi nimiruien tuhənimwi nukurhunraha ia nəmri nərimiru nəha mhəsiai in. Fwe tui nəpən tīprənə ramiwən ihi kuvərai pen raka nəghi nərmama ia nəkukuə nəha səvəi kwəti sipsip sə kinousi əpune.

⁹ Iərmama sə nəkwəregin rarə traməkeikei mətərig amasan.

¹⁰ Iərmama sə kimərfi mə trevən ia kalapus traməkeikei mevən.

Iərmama sə kimərfi mə tukərai əpune ia nau səvəi naruagənien,
tukaməkeikei kərai əpune.

Ti nəri nə mə tro iamihhi irə mine ro pen nərmama me səvəi Kumwesən tuhaməkeikei mhərer əknekən ia nahatətəien səvənraha ia nəpən me.

Nərimiru riti sə rukrirapw ia reri tīprənə mutə

¹¹ Nənə iakətoni mwi nərimiru riti mwi rukrirapw ia reri tīprənə mutə. Kənkəpati kəru krouəmwhen ia kwəti sipsip riti. Rəgkiari rerin rəmwhen ia snek asori riti. ¹² Nərimiru sə rīməkupwən muvehe ruvei pen nasorrien me pam səvənhi min. Ramərer ia nəmri nərimiru sə rīməkupwən muvehe, maməkeikei m

13:7: Rev 11:7 **13:8:** Sam 69:28, Rev 3:5, 5:6, Rev 17:8, Rev 20:12,15, Rev 21:27 **13:10:** Jer 15:2, 43:11, Mat 26:52, Rev 14:12

nərmama me pam ia təkure tɪprənə mə tuhənɪmwi nukurhunraha ia nənimen mhəsiai nərimɪru sə rɪməkupwən muvehe kɪnəpi əpune kənkəpwə riti mətə rarə mɪmɪru mwi təmwiki nau ruvehe mɪnamə. ¹³ Nərimɪru sə rɪməkurirə muvehe ramo nɪmtətien asori me, mɪni napw rukrutə ia neiai meiwaiu pehe ia tɪprənə ia nəmri nərmama. ¹⁴ In ramərer ia nəmri nərimɪru sə rɪməkupwən muvehe mamə nɪmtətien me kɪnəsəni pən in mə tro. Ia noien nəha in reikuə ia nərmama me səməme kamharə ia təkure tɪprənə mamɪni pən tɪ nɪrəha i mɪnuə tuhaməkeikei mhəuvrəkɪn nari riti mhəuvnhi nərimɪru sə kɪnəpi əpune in ia nau mətə rarə mɪmɪru mwi. ¹⁵ Nənə nəri nəha kɪməuvnhi nərimɪru nəha irə kəsəni nərimɪru sə rɪməkurirə muvehe mə treiahag pən irə pwəh rəgkiari. Nənə nənimwi nari nəha rəgkiari skai mɪni mə tukaməkeikei kousi əpune nərmama me pam səməme həkɪnɪmwi mhə nukurhunraha ia nənimen mhəsiai in. ¹⁶ Nənə in raməkeikei m nərmama me pam, nərmama kamhəuvehi nasoriien mɪne nərmama həkpuvehi mhə nasoriien, nərmama nautə səvənraha rasori mɪne nərmama nautə səvənraha riwən, nərmama kamoslef ia nɪrəha mɪne nərmama kɪpkə mhə slef ia nɪrəha. In raməkeikei mɪnraha mə tuhəuvehi mak riti ia rəgɪnraha mwatuk uə ia nɪpwənanraha. ¹⁷ Mak nəha in nəha nəghi nərimɪru nəha uə nampa sə ramahatən nəghɪn. Trɪni mɪnuə iərmama riti mak nəha riwən irə, kə rɪpkuvehi mhə nəmri nari riti, məpwəh nəmri penien nəmri nari ia nari riti.

13:13: Mat 24:24, 1King 18:24-39 **13:14:** Dut 13:1,4, Rev 19:20

13:15: Dan 3:4-6 **13:17:** Rev 14:9,11, Rev 16:2, 19:20, Rev 20:4

18 Ro iam̄nhi irə tikaməkeikei mo nukurəniēn səim rəpwəmwis mwi ti nukurəniēn nampa səvəi nərimitu nəha. Nənə trini minuə nukurəniēn səim rəmwhen tikukurən niniēn nīpwrān. Nampa nəha sikis-hantret-sikisti-sikis, ramahatən iərmama riti.

14

Kwəti sipsip mine səvənhi nərmama me irəha pam 144,000

¹ Nənə iakəti pen fwe ia təkuer Saeon, mətoni kwəti sipsip ramərer ia təkuren, nərmama wan-hantret-foti-fo-taosen kamhərer irəha min. Kimərai pen nəghi kwəti sipsip mine Tata səvənhi ia nīpwənanraha. ² Nənə iakregi reri iərmama riti fwe ia neiai raməgkiari, reri nəmwhen ia nui sə ramivə mamierig, məmwhen mwi ia karuəruə raməkwəpahar asori. Reri iərmama nəha iakregi rəmwhen ia nərmama me i kamhəuəsi nəri kauəsi kaməni nīpu irə. ³ Irəha kamhərer kupwən ia jea sə Kumwesən raməkure irə məmərimənu ipaka ti nərimitu me nəha kefə mine nəmə asori me nəha twenti-fo, mamhani nīpu vi riti. Iərmama riti rīpkukurən mhə nīpu nəha, nərmama me a nəha irəha wan-hantret-foti-fo-taosen səməme Kumwesən rīfi nari ia nīrəha mīpeki raka irəha ia təkure tīprənə, irəha həkuren. ⁴ Irəha i nərmama me i səməme hənatuakəm amasan, mhəmher, ti nəri nə mə həpkiri raka mhə pran. Irəha nərmama vi a. Irəha kamhəkurirə kwəti sipsip məmhəuvən ia kwopun me pam in ramevən ikin. Nərmama

14:1: Rev 3:12, 7:3,4 **14:2:** Esik 1:24, 43:2, Rev 1:15, 19:6
14:3: Sam 149:1, Aes 42:10, Rev 5:9, 7:4 **14:4:** Efes 5:27

me pam, mətə kifi nari ia nirəha i, kipeki raka irəha həmwəhen ia kwənkwai nei kukupwəhən kesi kuvehi pen m Kumwesən mine kwəti sipsip. ⁵ Nənə ia tərhunraha kipekətə mhə neikuəien riti ti nəri nə mə irəha hatukwatukw pam.

Nagelo me kahar

⁶ Nənə iakətoni mwi agelo riti mwi ramivə irənhə ia nimagouagou mauvehi nəgkiariien amasan riti sə ramarə rerin trəvisau irapw i m nərmama səməme kamharə ia təkure tīprənə, nərmama səvəi tənəmtənə me pam, mine kwənəkwas me pam, mine nəgkiariien me pam, mine teki nərmama me pam. ⁷ In rəgkiari rerin rupwinari mini mə, “Həsiai Kumwesən, mhəgnəgini in, ti nəri nə mə nəpən atukwatukw səvənhi ruvəuvehe mə trərpwin noien me səvəi nərmama. In rino neiai mine tīprənə mine təsi mine nəmri nui me. Kimiaha tihaməkeikei mhənimwi nukurhumiaha me ia nənimen mhəsiai in.”

⁸ Agelo riti sə ro kəru irə rukurirə mwi agelo nəha, muvehe, mamini mə, “In ruvəmwei! Taon asori nəha Pabilon ruvəmwei! Taon nəha rəmwəhen ia pran riti səvəi suatuk rivi nərmama ia tənəmtənə me pam həuvehe mhənimwi waen irəha min. Waen nəha sənmwən in nə noien ərəha sə nərman me kamho irəha min.”

⁹ Nənə agelo riti mwi sə ro kahar irə, rukurirə pen mwi irau, rini nəgkiariien i rerin rupwinari mə, “Trini minuə iərmama riti rini mwi nukurhun mi ia nəmri nərimiru mine nəri kuvrhəkən kuvnhi nərimiru irə, misiai in, muvehi mak səvənhi ia

nīpwānan uə rəgin, ¹⁰ niemaha səvəi Kumwesən treste in. Niemaha nəha rəmwhen ia waen riti sə riskai pik Kumwesən ruvi pen ia kap səvənhi muvehi pen m iərmama nəha rənīmwi. Nənə in trīregi nəmisəien ia napw mine təpisi ərəha, trouahi in ia nəmri nagelo ikinan me mine kwəti sipsip. ¹¹ Nise napw sə ramo nəmisəien mīnraha rautə ia nuk nuk me. Nərmama me i səməme hənīmwi nukurhunraha ia nəmri nərimīru, mhənīmwi mwi nukurhunraha ia nəmri nəri kuvrhəkin kuvnhi nərimīru irə, mhəsiai in, uə sin nəghin ruvehi mak sə rahatən nəghi nərimīru, irəha tuhəregi nəmisəien ia nəpīn mine ia ran mhəpwəh napwīsien.” ¹² Tī nəri nə mə tro iamīnhi irə mine ro pen nərmama me i səvəi Kumwesən kamho nəgkiariien me səvənhi, nənə mamhahatətə ia Iesu, tuhaməkeikei mhərer əknekīn ia nəpīn me.

¹³ Nənə iakregi reri iərmama riti ruku pen ia neiai mīni mə, “Rai pen nəgkiariien i ia nəkukuə: Ipwet mine mamevən trīni mīnuə nərmama me səvəi Iərimənu hemhə rerīnraha tragien.”

Nənə Nənīmwin Ikinan rīni mə, “Ouəh pərhien. Irəha tuhapwis mhəpwəh mwi nəmwurien tī nəri nə mə noien amasan me səvənraha tuhəkurirə pen irəha.”

Kumwesən treivə testesi nərmama rəmwhen kamo ia tīpwə krep sə rīmarei

¹⁴ Iakəti pen mətoni mwi nəpuə riti rəpsan nənə iərmama riti raməkure utə ia nəpuə nəha.

14:10: Jen 19:24, Sam 11:6, 75:8, Aes 51:17,22, Jer 25:15, Esik 38:22, Rev 15:7, 16:19, Rev 19:20, 20:10, Rev 21:8 **14:11:** Aes 34:10, Rev 13:12-17, Rev 19:3 **14:12:** Rev 12:17, 13:10 **14:13:** 1Kor 15:58, Hip 4:10 **14:14:** Dan 7:13

Iærmama naha ræmwhen ia iæmæti iærmama riti. In ramæfæfau ia kæfæfau sævæi nisaiien kîno ia kol, mauvehi nau ikou riti ræhiæ. ¹⁵ Nænæ agelo riti mwi rier ia nimwæ sævæi Kumwesæn, mamækwein æpwæmwis iærmama naha ramækure utæ ia næpuæ mamîni mæ, “Uvehi nau ikou sæim, mærai raka nærmama ia tækure tîprænæ. Næpin tukærai raka iræha iræ ruvæuvehe ti næri næ mæ iræha hæmwhen ia næveginien sæ ruvæmruæ ia næmhien.” ¹⁶ Ro iamînhi iræ iærmama sæ ramækure utæ ia næpuæ ruini pen nau ikou sævænhi ia tækure tîprænæ, mærai raka nærmama ia tækure tîprænæ ræmwhen kamo ia næveginien sæ ruvæmruæ ia næmhien. ¹⁷ Agelo riti mwi rier ia nimwæ sævæi Kumwesæn fwe ia neiai, mauvehi mwi nau ikou riti sævænhi ræhiæ. ¹⁸ Nænæ agelo riti mwi rier, in agelo sæ ramætui ti napw ia tækure nifatæ. In rier mækwein æpwæmwis agelo sæ rauvehi nau ikou mîni mæ, “Uvehi nau ikou sæim, mærai raka nærmama ia tækure tîprænæ ræmwhen kamo ia tîpwe krep sæ rîmarei.” ¹⁹ Ro iamînhi iræ agelo naha ruini pen nau ikou sævænhi ia tækure tîprænæ, mærai raka nærmama ia tækure tîprænæ ræmwhen kamo ia tîpwe krep sæ rîmarei, nænæ mæranki pen iræha ia kwopun asori riti. Tukeivæ testesi iræha ikîn ræmwhen kamo ia tîpwe krep sæ rîmarei mæ nîsen trarîs. Kwopun naha iruæ ia taon, kwopun sæ Kumwesæn truvehi irapw niemaha sævænhi ikîn. ²⁰ Nænæ keivæ testesi nærmama me naha ræmwhen kamo ia tîpwe krep sæ rîmarei mæ nîsen trarîs. Nîtenraha rier ia kwopun naha maiu meste nari fwe tri-hantret kilometa. Ko hos ravæn iræ netæ naha rutæ meste tærhun.

14:15: Joel 3:13
1:15, Rev 19:15

14:18: Joel 3:13

14:20: Aes 63:3, Krae

15

Nagelo irəha sefen kamhəuvehi nərpwɪnien irəha sefen

¹ Iakəti pen fwe ia neiai mətoni mwi nɪmtətien riti mwi rasori iakərkərinari irə. Nagelo irəha sefen kamhəuvehi nərpwɪnien me irəha sefen. Nərpwɪnien me nəha irəha sampam tɪ nəri nə mə nəpɪn tuhəier pam nənə niemaha səvəi Kumwesən riwən. ² Nənə iakətoni nari riti rəmwhen ia təsi kɪno ia klas ko kərapɪ irə irau napw. Iakətoni mwi nərmmama nərpwɪn kamhərer ia nɪkarkare təsi nəha. Nərmmama me nəha hənəpwəh nəsenien nərimɪru mɪne nəri kuvrhəkin kuvnhi nərimɪru irə mɪne nampa sə ramahatən nəghɪn mə trasori ia nɪrəha. Irəha kamhərer ia nɪkarkare təsi kɪno ia klas. Ia rəgɪnraha kamhəuvehi nəri kauəsi kaməni nɪpu irə Kumwesən rɪməuvei pen mɪnraha. ³ Irəha kamhani nɪpu səvəi Moses iərmmama sə ro tukwini nari m Kumwesən, mɪne nɪpu səvəi kwəti sipsip, mamhani mə,

“Iərɪmənənu Kumwesən sə ikauvehi nɪskaiien me pam,

narimnari me səməme ikamo hasori kətoni kamərkərinari irə!

Ik kig sə ikamərɪmənənu ia tənəmtənə me,

suatuk me səim ikamesi pen suatuk me səvəi natukwatukwien mɪne nɪpərhienien!

⁴ Nərmmama me pam tuhaməkeikei mhəsiai ik, mhəuvehi utə nəghɪm, tɪ nəri nə mə ik əpa Iəmə ikinan.

15:1: Lev 26:21, Rev 15:6-7 **15:2:** Rev 4:6, 5:8 **15:3:** Eks 15:1, Rev 11:17, 16:7, Sam 92:5, Sam 139:14, Sam 145:17 **15:4:** Jer 10:6-7, Sam 86:9

Nərmama ia tənəmtənə me pam tuhəuvehe
 mhənīmwi nukurhunraha ia nənimem
 mhəsiai ik
 ti nəri nə mə ikino raka noien atukwatukw me
 səim nərmama hənətoni.”

⁵ Irəha hani raka nīpu nəha, nənə iakəti
 pen mətoni kəsevər ia kwopun ikinan anan ia
 nəkwai nimwə tapolen fwe ia neiai. ⁶ Nagelo
 me nəha irəha sefen həier ia nimwə tapolen
 nəha, mamhəpeki nərpwinien me nəha sefen.
 Tinari səvənraha kīno ia linen sə rəpsan
 mamser. Həkwanī nari kīno ia kol rukurau ia
 kwənpwenhinraha. ⁷ Nənə nərimiru me nəha kefə
 riti rīpeki pen pesin me səməme kīno ia kol muvei
 pen kuatia kuatia m nagelo me nəha sefen. Pesin
 me nəha həukuər ia niemaha səvəi Kumwesən,
 Kumwesən sə ramarə ia nuk nuk me. ⁸ Ia nəpīn
 nəha nimwə tapolen ruvehe mukuər ia nise napw,
 ti nəri nə mə Kumwesən ramarə ikin, mamser,
 mamə nəgsen. Iərmama riti ko rīpkuvnimwə
 mhə ia nimwə nəha meste nərpwinien me sefen
 səməme nagelo sefen kamhəpeki tuho sampam
 irə.

16

*Pesin me irəha sefen həukuər ia niemaha səvəi
 Kumwesən*

¹ Nənə iakregi reri iərmama riti raməgkiari
 asori fwe ia nimwə səvəi Kumwesən, mamini
 pen ti nagelo me nəha sefen mə, “Həuvən mətəgi
 irapw ia təkure tīprənə pesin me nəha sefen

15:5: Eks 38:21 **15:6:** Rev 15:1 **15:7:** Rev 14:10 **15:8:**
 1King 8:10-11, Aes 6:4, Esik 44:4 **16:1:** Aes 66:6, Rev 16:17, Sam
 69:24, Jer 10:25, Sef 3:8

hæukuær ia niemaha sævæi Kumwesæn.” ² Agelo sæ rakupwæn revæn mætægi irapw pesin sævænhi ia tækure tīprænæ. Nænæ nærmama me næha sæmæme mak sævæi nærimīru ramaræ ia niræha, mīne sæmæme kāmhænīmwi nukurhunraha ia næmri næri kīmæuvrhækin kuvnhi nærimīru iræ, mamhæsiai in, nīpwrænraha ruvehe mukuær ia nīmwapw me. Nīmwapw me næha hæræha mamho næmisæien mīnraha.

³ Agelo sæ ro kærū iræ rætægi irapw pesin sævænhi ia tæsi, nænæ tæsi ruvehe mo netæ iræ ræmwhen ia nite iærmama ruvamhæ, narimnari me kāmhamīru ia reri tæsi hemhæ pam.

⁴ Agelo sæ ro kahar iræ rætægi irapw pesin sævænhi ia nui aris me mīne næmri nui me, nænæ iræha hæuvehe mhō netæ ia niræha. ⁵⁻⁶ Nænæ iakregi agelo sæ ramærimænu ia nui me rīni mæ,
 “Kumwesæn Ikinan. Ik ikīnaræ fwe kupwæn mu-
 vehe meste mwi ipwet mīne.

Tækwætækwuni ikamo noien atukwatukw,
 māmærpwīn noien æræha me i,
 mauvei pen netæ mīnraha hamænīmwi.

In i nærækuien atukwatukw sævænraha,
 ti næri næ mæ iræha hænousi æpune nærmama
 me sæim mīne profet me sæim nītenraha
 raiu.”

⁷ Nænæ iakregi reri iærmama riti ruku pen ia nīfatæ ramīni mæ,
 “Ouæh pærhien Iærimænu Kumwesæn sæ ikauvehi
 nīskaiien me pam,

16:2: Eks 9:10, Dut 28:35, Rev 13:12-17 **16:3:** Eks 7:17-21

16:4: Sam 78:44 **16:5-6:** Sam 79:3, Sam 119:137, Aes 49:26,
 Rev 1:4 **16:7:** Sam 19:9, Rev 15:3, 16:14, Rev 19:2

nəkiriien me səim hatukwatukw mho
nīpərhiēnien!”

⁸ Nənə agelo sə ro kefə irə rətəgi irapw pesin səvənhi ia meri, nənə Kumwesən rəsēni nukwəsikər mə trənhi nərmama rəmwhēn ia napw. ⁹ Nəpnəpanien səvəi nukwəsikər rahi irəha, nənə irəha həni ərəha nəghi Kumwesən sə ramərimənu ia nərpwīnien me nəha. Irəha həpwəh nīrərigien ia noien ərəha me səvənraha, mhəpwəh nuvehi utəien nəghin.

¹⁰ Agelo sə ro krirum irə rətəgi irapw pesin səvənhi ia jea sə nərimiru raməkure irə mamərimənu, nənə kwopun me pam ia nəkwai nitətə sə nərimiru ramərimənu irə həuvehe mhəpitəv pam. Nərmama kamhəregi nəmisəien, mamhahi nəraminraha tukwe. ¹¹ Irəha kamhəni ərəha Kumwesən fwe ia neiai ti nəmisəien me mine nimwapw me səvənraha, mhəpwəh nīrərigien ia noien ərəha me səvənraha.

¹² Nənə agelo sə ro sikis irə rətəgi irapw pesin səvənhi ia nui aris asori nəha nəghin nə Iufretes, nənə nui aris nəha ramə, mo suatuk səvəi kig me havən irə mhəuku peraha. ¹³ Ia nəpin nəha iakətoni nənimwīn əmkemik kahar harəmwhēn ia frok. Riti rier ia nīpəgi nəkwai snek asori, riti rier ia nīpəgi nəkwai nərimiru, nənə riti rier ia nīpəgi nəkwai profet eikuə. ¹⁴ Nənimwīn mirəhar nəha irəhar nəremhə me kamharo nīmtətien me. Irəhar harier, mhərevən ti kig me ia tənəmtənə me pam, mharousəsimwīn irəha mə tuharuagən

16:9: Rev 9:20-21, Rev 16:21

16:10: Eks 10:22, Aes 8:22

16:11: Rev 9:20-21, Rev 16:21

16:12: Aes 11:15, Jer 50:38

16:14: Rev 16:7, Rev 19:6,15,19

ia nǝp̄in asori sǝvǝi Kumwesǝn, Kumwesǝn sǝ rau-
vehi n̄iskaiien me pam.

¹⁵ “Hǝregi ro! Iou iakauvehe rǝmwhen ia rakres!
Iǝrmama sǝ ramǝtui a mǝpwǝh napriien rer̄in
tragien. Rǝrǝha in ripek̄i raka tinari sǝvǝnhi ti
napriien kǝtoni in ramavǝn auǝr a nǝnǝ in rauris
tukwe.”

¹⁶ Nǝremhǝ mirǝhar nǝha harousǝsimwin pen
kig me nǝha ia kwopun riti nǝgkiariien Hipru rani
mǝ, “Amaketon.”

¹⁷ Agelo sǝ ro sefen irǝ rǝtǝgi pen pesin sǝvǝnhi ia
nimagouagou, nǝnǝ iakregi Kumwesǝn ramǝgkiari
fwe ia nǝkwai nimwǝ sǝvǝnhi. Rer̄in ruku pen ia
jea sǝ in ramǝkure irǝ mamǝrimǝnu, mamini mǝ,
“In i sampam!” ¹⁸ Nǝnǝ nouap̄irien rǝhiapw,
karuǝruǝ rǝrkwǝpahar, kregi nǝrkǝrikien,
nimwn̄imwien asori riti ravǝn. Nimwn̄imwien
nǝha rasori pik̄ anan. Fwe Kumwesǝn r̄ino
iǝrmama ia tǝkure tip̄rǝnǝ meste pehe nǝp̄in nǝha
kip̄kǝtoni raka mhǝ nimwn̄imwien riti ro iam̄inhi
irǝ ia nǝp̄in riti. ¹⁹ Nimwn̄imwien nǝha ravǝn
meitehi taon asori nip̄ǝr̄in kahar, nǝnǝ taon me ia
tǝnǝmtǝnǝ me hǝsas pam. Kumwesǝn rer̄in rir̄hi
taon asori nǝha Papilon, nǝnǝ in ruvehi pen kap
riti rukuǝr ia waen mamǝkeikei min mǝ trǝnimwi
pam. Waen nǝha in niemaha sǝvǝi Kumwesǝn rǝpi
pik̄ in ti taon nǝha. ²⁰ Tǝnǝ ǝmweris me pam hap
mhǝiwǝn. Kip̄kǝtoni mhǝ mwi tǝkuǝr me. ²¹ Aes
me sǝmǝme hǝmwhen ia kǝpwier asori hǝukrutǝ ia
nimagouagou mhǝsas pen ia nǝrmama. Ko kǝkiri

16:15: Rev 3:3,18 **16:16:** Jaj 5:19, Sek 12:11 **16:17:** Rev
16:1 **16:18:** Rev 4:5 **16:19:** Rev 14:10 **16:20:** Rev 6:14
16:21: Eks 9:24, Rev 11:19, Rev 16:9,11

kəpwier me nəha kuation kuation nɪpamien səvənhi rəmwhen ia fifti kilo. Nəpɪn nərmama hətoni aes me nəha kamhəsas pen ia nirəha iamɪnhi irə, irəha həni ərəha Kumwesən, ti nəri nə mə nərpwɪnien nəha in ramo mɪnraha rɪskai pɪk anan.

17

*Taon asori Pabilon rəmwhen ia pran səvəi su-
atuk*

¹ Nənə nagelo me nəha sefen kamhəuvehi pesɪn me nəha sefen riti ia nirəha ruvehe mɪni pehe tukwiou i mə, “Uvehe ro. Prən asori fwe raməkure ia nui me həpɪk, iakuə takahatən nərpwɪnien səvənhi pwəh ikətɔni. Prən nəha in pran səvəi suatuk. ² Kig me ia təkure tɪprənə həno əpnəpen raka nari irəha min. Noien ərəha sə prən nəha ramo irəha nərman me rəmwhen ia waen riti. Nərmama ia təkure tɪprənə hənənɪmwɪ raka waen nəha mamhakonə irə.”

³ Nənə ia vison nəha Nənɪmwɪn rəriari miou, iakətə agelo nəha ruvehi iou iarouevən fwe ia kwopun akwesakwes ikɪn. Ia kwopun nəha iakətɔni pran riti raməkure utə ia nərimɪru riti. Nərimɪru nəha rəruevən pɪk kɪrai pen nəhag me ia nɪpwrən me pam. Nəhag me nəha kamhəni ərəha Kumwesən. Nərimɪru nəha kənkapwə sefen, kənkepəti ten. ⁴ Pran nəha tɪnari səvənhi rəmwhen ia tɪhi natis, məruvən pɪk. In ramo pen marəmarə me ia nɪpwrən, marəmarə me nənimen rutə pɪk kɪno ia kol mɪne kəpwier amasan me mɪne perel me. In rauvehi kap riti ia rəgɪn kɪno ia kol. Kap

17:1: Jer 51:12-13, Rev 17:15 **17:2:** Aes 23:17, Rev 14:8 **17:3:** Rev 13:1 **17:4:** Jer 51:7, Rev 18:16

nəha rukuər ia noien me nərman me kamho irəha min hərəha pik mhəmkemik ia nəmri Kumwesən.

⁵ Ia nīpwənanan kirai pen nəghin riti sə nīpwrān rərkwafə. Rani mə,

TAON ASORI PAPILON

MAMA SƏVƏI NĪPRAN ME PAM SƏVƏI SUATUK
NUKUNE NOIEN ME PAM SƏMƏME HƏRƏHA PĪK
IA TƏKURE TĪPRƏNƏ

⁶ Nənə iakətoni mə prən nəha rinousi əpune nərmana me səvəi Kumwesən mine irəha səməme həməni irapw Iesu. Rəmwhen in rinənimwi nitenraha mamakonə irə. Nəpīn iakətoni prən nəha iakərkəri asori nari irə. ⁷ Mətə agelo rini pehe tukw iou i mə, “Ikamərkərinari iamīnhi irə ti nəfe? Iou takəusiəre pui pehe nīpwrāi nəri nəha ikamətoni, mo nukurənien i mə sin nəha prən nəha mine nəfe nəha nərīmīru nəha in raməkure irə kənkəpwə sefen kənkəpati ten. ⁸ Nərīmīru nəha ikətoni ramīru fwe kupwən, mətə təkwtəkwuni ruvamhə, tīpko mhə tui rukrirapw ia nīpəg sə rameiwaiu nukunen riwən mutə mier mevən kousi əpune. Nərmana kamharə ia təkure tīprənə səməme kīpkrai pen raka mhə nəghinraha fwe tui nəpīn tīprənə ramiwən ihi ia nəkukuə səvəi nīmīruien, irəha tuhətoni nərīmīru nəha, nənə həkərinari irə ti nəri nə mə ramīru fwe kupwən, mətə təkwtəkwuni ruvamhə, nənə tīpkuvehe mwi. ⁹ Iərmama traməkeikei mukurən nari ti nukurənien nīpwrāi nəgkiariien i. Kənkəpwə nərīmīru nəha irəha sefen irəha nə təkue me səməme pran nəha raməkure utə ia nīrəha. Irəha mwi kig me. ¹⁰ Kig me irəha krirum həuvəmwei

17:5: Rev 14:8 **17:6:** Rev 18:24, 19:2 **17:7:** Rev 13:1 **17:8:** Dan 12:1, Rev 11:7, 13:8

raka, kuatia ramiru naha təkwtək>wuni mine, nənə riti mwi rəpwəh ihi nuveheien. Nəpɪn truvehē traməkeikei marə ouihi a. ¹¹ Nərimiru i sə ramiru fwe kupwən, mətə təkwtək>wuni ruvamhə, in mwi in kig riti sə ramo eit irə, mətə in mwi in kig riti səvəi kig me naha sēfen. In trevən kousi əpune in. ¹² Kənkəpati me naha ten ikətoni, irəha kig me ten həpwəh ihi nərimənuien, mətə irəha tuhəpkuvehi nasoriien mhərimənu ia nəpɪn ouihi a irəha nərimiru naha. ¹³ Nətərigien səvənraha kuatia, nənə irəha tuhəuvei pen niskaiien səvənraha mine nasoriien səvənraha m nərimiru naha. ¹⁴ Irəha tuharuagən irəha kwəti sipsip, mətə kwəti sipsip truvehē irəpw niskaiien səvənraha ti nəri nə mə in lərimənu sə rasori ia nərimənu me pam, nənə, in Kig sə rasori ia kig me pam. Nərmama me naha kəmhərer irəha min irəha naha nərmama səməme in rinəkwein irəha, mərpwi rəgin ia nirəha, nərmama səməme in rukurən nətigiteien ia nirəha.”

¹⁵ Nənə agelo rini pehe mwi tukw iou i mə, “Ikətoni nui me naha pran səvəi suatuk raməkure ia nirəha. Nui me naha irəha nərmama həpik tekɪnraha səpəmsəpə, nəgkiariien me səvənraha səpəmsəpə, həkuku pen ia kwənək>wus me səpəmsəpə. ¹⁶ Nərimiru naha mine kənkəpati me naha ten səməme ikətoni, irəha tuhəmwəki pran səvəi suatuk, mhəpeki raka pam narimnari me səvənhi, mhəpwəh in ramaiu auər a. Irəha tuhani nusan mhəuvani əmwesi in ia napw. ¹⁷ Irəha tuho iamɪnhi irə ti nəri nə mə Kumwesən rinəmri

17:12: Dan 7:24 **17:14:** 1Tim 6:15 **17:15:** Aes 8:7, Jer 47:2

17:16: Rev 18:8

ia nətərigien səvənraha mə tuho rəmwhen sə in rokeikei. Nətərigien səvənraha truvehe mo kuatia i, nənə irəha tuhəuvei pen niskaiien səvənraha m nərımıru mə trərimənu meste nəgkiariien səvəi Kumwesən ruvehe mukuə. ¹⁸Prən nəha ikətoni in taon asori nəha sə ramərimənu ia kig me pam ia təkure tıprənə.”

18

¹ Kurirə ia narimnari me i, iakətoni agelo riti mwi rukrutə ia neiai mameiwaiu pehe. In rauvehi nasoriien sə rasori. Nukuraanien sə ruku pen irə raməhiəpwın pam tıprənə. ² Rəkwein əpwəmwis mini mə,

“In ruvəmwei! Taon asori nə Papilon ruvəmwei!

Təkwtəkwwuni nəha nəremhə me kamharə ikin.

In kwopun nənimwın ərəha me mine menu me səməme həmkemik kaməmwəki irəha kamhərkwafə ikin.

³ Taon nəha rəmwhen ia pran riti səvəi suatuk.

Nərmama me pam ia tənəmtənə me hənənimwi raka waen sənmwın.

Waen nəha in noien ərəha sə nəрман me kamho irəha min.

Kig me ia təkure tıprənə həno əpnəpen raka nari irəha prən nəha.

Nərmama ia təkure tıprənə səməme kamhəmri pen nəmri nari ia narimnari irəha nautə səvənraha ruvəuvehe minasori ruku pen ti noien ərəha me səvəi prən nəha.”

⁴ Nənə iakregi mwi reri iərmama riti fwe ia neiai rini mə,

“Həier irə nərmama me səiou
 minuə noien ərəha səvənhi trəpwəh nuvehi
 pekiniēn kīmiaha,
 nənə kīmiaha tihəpwəh nuvehien
 nərpwiniēn riti səvənhi.

⁵ Noien ərəha me səvənhi rasori rutə ipaka rirapi neiai,
 ro pen Kumwesən rəpwəh nenouenouien
 nərəhaiēn me səvənhi.

⁶ Kīmiaha tiho irə rəmwhen rino ia kīmiaha.
 Narimnari me səməme in rino ia kīmiaha,
 kīmiaha tihaməkeikei mhərpwīn pen m kəru
 min.

In rīməvi pen nənīmwiien skai kuatia ia kap
 səkīmiaha,
 kīmiaha tihaməkeikei mhəvi pen nənīmwiēn
 skai ia kap səvənhi m kəru.

⁷ Taon nəha rəmwhen ia pran riti sə rauvehi utə
 atukw a in,
 mamarə ia narəien sə rukuər ia narimnari
 amasan me.

Ro iamīnhi irə kīmiaha tihaməkeikei mhəuvei pen
 nəmisəien mīne nasəkien min rəmwhen irə.
 In rani ia rerin mə,

‘Iou pran asori iakaməkure ia kwopun i
 mamərimənu.

Ripko mhə iou pran sə iərman səvənhi ru-
 vamhə.

Ko iapkasək mhə ia nəpīn riti.’

⁸ Pran nəha ramərpwi atukw a in iamīnhi irə ro

18:4: Aes 48:20, Jer 50:8, Jer 51:6,45, 2Kor 6:17 **18:5:** Jen
 18:20-21, Jer 51:9 **18:6:** Sam 137:8, Jer 50:15,29, 2Tes 1:6 **18:7:**
 Aes 47:7-9 **18:8:** Jer 50:34, Rev 17:16

pen narpwɪnien me səvənhi tuhəuvehe ia
 nəpɪn kuatia a:
 nemhəien, nasəkien, mine nukumhə.
 Napw trahi prən nəha,
 ti nəri nə mə Iərimənu Kumwesən sə rauvei
 pen narpwɪnien min niskaiien səvənhi ra-
 sori.”

⁹ Nəpɪn kig me səvəi tɪprənə səməme hənə
 əpnəpen raka nari irəha prən nəha nənə mharə
 irəha min ia narəien sə rukuər ia narimnari
 amasan me tuhətoni nise napw sə ramahi in,
 nənə rerinraha trəpou hasək tukwe. ¹⁰ Nəmisəien
 səvənhi tro irəha həhekɪr, nənə mhərər pen a
 isipwɪn mə,

“Aueh taon asori!

Aueh Pəpilon taon sə nəgsem rasori!

Nərpwɪnien səim ruvəuvehe ia aoa kuatia a.”

¹¹ Nərmama me ia təkure tɪprənə kamhəmri pen
 nəmri nari ia narimnari tuhasək ti prən nəha
 ti nəri nə mə iərmama riti mwɪ riwən truvehi
 nəmri narimnari me səvənraha. ¹² Narimnari me
 səvənraha rəmwhən ia aean mi nəha kol mine
 silva, mine kəpwier amasan me, mine perel me,
 mine tɪnari amasan nəha linen, mine tɪnari sə ro
 tihi natis irə, mine tɪnari nəha silik, mine tɪnari sə
 rəruevəv pɪk, mine nei me səpəmsəpə nɪpekɪnraha
 rapəin amasan, mine narimnari me səpəmsəpə
 kɪno ia kənkəpati elefen, mine narimnari me
 səpəmsəpə kɪno ia nei nənimen rutə pɪk, mine
 aean me nepwɪn rəmwhən ia prons, mine kəpwier
 amasan nəha mapil, ¹³ mine teki nei sinamon,
 mine nɪmwai nari kavi rərəgi pen ia nəveginien,

18:9: Rev 17:2, Esik 27:30-35 **18:10:** Esik 26:17, Dan 4:30

18:11: Esik 27:36 **18:12:** Esik 27:12,13,22

mine nimwəkmwəki nari kuvani nipekin rapein amasan, mine nise nei mi nəha fragkinsens mine mir, mine waen, mine oel, mine flaoa, mine kwənuni wit, mine kau me mine sipsip me, mine hos me mine kat me hos me kambahəvi, mine slef me, slef me nə irəha nərmama.

¹⁴ “Narimnari amasan me pam səməme nətərigien səim ramevən ia nirəha, hənəpwəh ik mhəuvavən.

Nautə me pam səim mine marəmarə me pam səim ikinətə wau raka ia nirəha, nənə ko ipkətoni mhə mwi irəha ia nəpən riti.”

¹⁵ Nərmama me nəha səməme kambahəmri pen nəmri nari ia narimnari me nəha həpeki nautə rīpik ruku pen ti prən nəha. Irəha tuhəhekir nəmisəien səvəi prən nəha, mhərer pen a isipwən tukwe in, mamhasək əpwəmwis ¹⁶ mə, “Aueh! Aueh taon asori!

In rəmwhen ia pran ramarkahu ia tīnari amasan i kani mə linen sə ro tihi natis irə raməruerəv pik.

In ramo pen marəmarə me ia nipwran, marəmarə me nənimen rutə pik kino ia kol, mine kəpwier amasan me, mine perel me.

¹⁷⁻¹⁸ Mətə kouraha pam nautə me səvənhi ia aoa kuatia a.”

Nənə nəmə səməme kambahəkəkini nitətə ia təsi, mine nərmama səməme kambahərəkū nitətə mamhəputə, mine nəmə səməme kamhowok ia nəkwai nitətə, mine nərmama səməme nitətə rapeki narimnari səvənraha muvehe mīpeki parei kambahəmri pen nəmri nari ia nirəha, mamhəuvehi

mane irə, irəha pam hətoni nise napw sə ramahi
prən nəha, mhərer pen a isipwɪn tukwe in,
mamhasək əpwəmwis, mamhəni mə,

“Taon asori riti riwən rəmwhen ia taon nəha!”

¹⁹ Irəha hərki pen nıməkwrur ia
kənkəpwənraha, rerinraha rəpou, kamhasək,
mamhəni mə,

“Aueh! Aueh taon asori!

Nərmama me pam səməme nitətə səvənraha ra-
maiu ia təsi,

irəha nautə səvənraha ruvehe masori ia
narimnari me səim!

Mətə kouraha pam narimnari me səim ia aoa kua-
tia a.”

²⁰ Mətə nıpu riti mwi rani iamınhi irə mınuə,

“Kımiaha ia nitətə ia neiai, kımiaha nərmama me
səvəi Kumwesən, mıne aposol me mıne pro-
fet me,

rerımiaha traməkeikei magien,

tı nəri nə mə Kumwesən rınərpwɪn noien
ərəha prən nəha rıno ia kımiaha!”

²¹ Nənə agelo riti nəgsen rasori ruvehi kəruətərei
asori riti mərarki pen i ia nəkwai təsi mını mə,

“Tukəraki irapw akwauakw taon asori nəha Papi-
lon iamınhi irə,

nənə tukəpwəh nətoniien mwi in ia nəpın riti.

²² Ia niram taon Papilon tıpkregi mhə mwi
nərmama səməme kamhəuəsi nəri kauəsi
kaməni nıpu irə,

uə nərmama səməme kamhəse tərhe nau mıne
kisipw.

18:19: Esik 27:30-34 **18:20:** Aes 44:23, Dut 32:43, Jer 51:48

18:21: Jer 51:63-64, Esik 26:21 **18:22:** Aes 24:8, Esik 26:13

Ia niram tīpkətoni mhə mwi iərmama sə ramarpəkau amasan narimnari me.

Tīpkregi mhə mwi kəpwier ramərari maməkawai ətestesi kwənuni wit kamo flaoa i.

²³ Nukuraanien səvəi laet tīpkəhiapw mhə mwi ia niram,

nənə tīpkregi mhə mwi reri iərman mine pran səməmi krauni simwīn tī narəien vi səvənrau.

Tro iamīnhi irə tī nəri nə mə fwe kupwən nərmama me səim səməme kamhəmri pen nəmri nari ia narimnari irəha kamhəuvehi nasorien ia təkure tīprənə.

Nərmama ia tənəmtənə me pam hətoni nīmətəien me nəha ikino ia niskaiien səvəi iəremhə reikuə ia nirəha.

²⁴ Ia taon nəha Pəpilon Kumwesən rətoni nite profet me mine nərmama me səvənhi.

Nərmama me pam ia təkure tīprənə səməme kīnousi əpune irəha Kumwesən rətoni nitenraha ia taon nəha.”

19

Nərmama fwe ia neiai həgnəgini Kumwesən

¹ Kurirə ia narimnari me i iakregi reri nari riti rəmwhen ia nərmama həpik fwe ia neiai, kamhəgkiari rerīnraha rupwinari mamhəni mə,

“Pwəh səgnəgini Iərimənu Kumwesən səkitaha!

In rauvehimīru kitaha. Nasorien mine niskaiien səvənhi əpa.

² Nəkiriiēn me səvənhi ho nīpərhiēnien, mhatuk-watukw.

In rinərpwīn raka noien ərəha səvəi taon asori nəha Pəpilon,

ti nəri nə mə taon nəha rəmwhēn ia pran səvəi suatuk

rouraha nərmama ia təkure tīprənə i ia noien ərəha səvənhi.

Kumwesən ruvəuvei pen raka nərpwīnien min, ti nəri nə mə kousi əpune səvənhi iotukwini-nari me ia taon nəha.”

³ Nənə irəha həgkiari asori mwi mə,

“Pwəh səgnəgini Iərimənu!

Nise napw sə ramahi taon nəha rautə ia nuk nuk me ko rīpkīwən mhə.”

⁴ Ia nəpīn nəha nəmə asori me nəha twenti-fo mine nərimiru me nəha kefə hənīmwi nukurhuraaha ia nəmri Kumwesən sə raməkure ia jea səvənhi mamərimənu, mhəsiai in, mhəni mə, “Ouah! Pwəh səgnəgini Iərimənu!”

⁵ Nənə reri iərmama riti ruku pen ia jea Kumwesən raməkure irə mamərimənu, mīni mə,

“Kīmīaha nərmama hiamə tukwini nari m Kumwesən, mamhəsiai in,

nəri auər a mə hiaməuvehi nasoriēn uə hīəpkuvehi mhə nasoriēn,

kīmīaha pam tihaməkeikei mhəgnəgini Kumwesən səkitaha!”

⁶ Nənə iakregi nari riti rəmwhēn ia nərmama həpīk kamhəgkiari, rərīnraha rəmwhēn ia nui sə

19:2: Rev 6:10, 16:7 **19:3:** Rev 14:11 **19:4:** Rev 4:2,10

19:5: Sam 22:23, Sam 134:1, Sam 135:1, Rev 11:18 **19:6:** Rev 11:15, 14:2, Rev 15:3, 21:2

ramivə mamierig, mine karuəruə ramərkwəpahar.
Irəha həni mə,

“Pwəh səgnəgini Iərimənu Kumwesən səkitaha
ti nəri nə mə in rauvehi niskaiien me pam,
mamərimənu!

⁷ Pwəh sagien, mhagien pik, mhəuvehi utə nəghin,
ti nəri nə mə nəp̄in ruvəuvehe tukiri pen vi a
pran m kwəti sipsip!

Pran səvənhi rinəpnəpenə pam raka,

⁸ mamarkahu ia tinari amasan nəha linen
kuvei pen min rəpsan məmher.”

(Tinari amasan nəha linen ramahatən pen
noien atukwatukw me səvəi nərmama me səvəi
Kumwesən.)

⁹ Nənə agelo nəha rini pehe tukw iou i mə,
“Rai pen nəgkiariien i ia nəkukuə. ‘Nərmama
səməme kinəkwein ia nirəha minuə tuhəuvən ia
nəveginien asori səvəi kwəti sipsip irəha rerinraha
tragien.’ ” Nənə agelo nəha rarə mini mwi tukw iou
i mə, “Nəgkiariien me i nəgkiariien pərhien səvəi
Kumwesən.” ¹⁰ In rini iam̄inhi irə, nənə iakinimwi
nukurhuk mi ia nisun mə takisiai in, mətə in
rini pehe tukw iou mə, “Tikəpwəh noien iam̄inhi
irə! Krau iotukwininari mi a, kitaha piam me
səməme kamhəuvehi nəgkiariien i Iesu rini mə ro
nipərhienien. Tikaməkeikei minimwi nukurhum
mi ia nəmri Kumwesən əpa, misiai in, ti nəri nə
mə nəgkiariien i Iesu rini mə ro nipərhienien in
nukune nəgkiariien me səvəi profet me.”

Iərmama sə raməkure ia hos əpsan

11 Nənə iakətōni kəsevər ia neiai. Iakəti pen mətōni hos əpsan riti. Iəmə sə raməkure irə nəghin nə “Iəmə sə Kamətigite Irə. In rani nīpərhiēnien.” Nəpīn in rəkiri nərmama uə raruagən, mətə in ramo ia noien sə ratukwatukw a. 12 Nənimen mi krouəmwhēn ia nərāmi napw. Ia təkure kənkəpwə kəfəfau səvəi nīsiāiēn me həpīk. Kīrai pen nəhag riti irə, mətə iərmama riti rīpkukurən mhə nahag nəha, in əpa in rukurən. 13 In ramarkahu ia tīnari riti kīneitesi ia netə. Nəghin sə kaməkwein in irə in nə “Nəgkiariēn səvəi Kumwesən.” 14 Naruagən me ia neiai kamhəkure ia hos əpsan me mamhəkurirə in, mamharkahu ia tīnari amasan nəha linen rəpsan məmher. 15 Iərmama nəha nau riti səvəi naruagənien rəhiə ruku pen ia nīpəgi nəkwān mamier. Ia nau nəha in truvehi irapw nīskaiēn səvəi nərmama ia tənəmtənə me, nənə muvehi nəri skai riti sə rəmwhēn ia nep ramahatən pen nasoriēn səvəi kīg, rauvehi mamərimənu ia nīrəha. In tro rīskai anan ia nīrəha rəmwhēn kamo ia tīpwei krep sə rīmarei nərmama kamheivə testesi mə nīsenraha traris. Noien nəha in nəha Kumwesən i rauvehi nīskaiēn me pam truvehi irapw niemaha asori səvənhi irə. 16 Kīmərai pen nəghin ia tīnari səvənhi mīne nuvan mə:

KIG SƏ RASORI IA KIG ME. IƏRİMƏNU SƏ RASORI
IA NƏRİMƏNU ME.

17 Nənə iakəti pen mətōni agelo riti ramərer pen ia meri. In raməkwein əpwəmwīs mani pen

19:11: Rev 1:5, 6:2, Sam 96:13, Aes 11:4 19:12: Rev 1:14, 2:17

19:13: Aes 63:1-3, Jon 1:1,14 19:15: Rev 1:16, 12:5, Rev 14:20,
4:8, Rev 21:22 19:16: Rev 17:14 19:17: Esik 39:17-20

ti menu me sēmame kāmhəivə ia nimagouagou mə, “Həuvehe mhousəsimwīn kīmiaha me ti nəveginien asori səvəi Kumwesən. ¹⁸ Həuvehe mhani nīpwrai kig me, mine nəmə asori me səvəi naruagən me, mine nərmama nəgsenraha rasori, mine hos me, mine nərmama sēmame kāməkure ia hos me. Həuvehe mhani nīpwrai nərmama me pam: irəha sēmame ko slef ia nīrəha mine sēmame kīpko mhə slef ia nīrəha, irəha sēmame kāməuvehi nasoriien mine sēmame həkūvehi mhə nasoriien.”

¹⁹ Nənə iakətoni nərimīru nəha, mine kig me səvəi tīprənə, mine naruagən me səvənraha housəsimwīn irəha me mə tuharuagən irəha ləmə sə raməkure ia hos mine naruagən me səvənhi. ²⁰ Nənə naruagən me səvəi ləmə nəha həuvən mhəkwtəmhiri nərimīru nəha, mine profet eikuə nəha sə rinamo nīmtətien me fwe kupwən nəpīn rinamərer irau nərimīru nəha. (In rinamo nīmtətien me nəha, mameikuə ia nərmama sēmame kāməuvehi mak səvəi nərimīru nəha, mine sēmame kāmənīmwi nukurhunraha ia nəmri nəri kivrəkīn kivrhi nərimīru irə mhəsiai in.) Irəha həkwtəmhiri irau, mhərarki pen mīru a irau ia kwopun əmwhənīmwi nəha napw mine təpisi ərəha krauuək ikīn. ²¹ Nənə kig me mine naruagən me səvənraha, ləmə sə raməkure ia hos rərai əpune irəha ia nau səvəi naruagənien sə ruku pen ia nīpəgi nəkwān mamier. Nənə menu me pam hani nīpwrānraha tīpwīnraha rəsisi amasan.

19:19: Sam 2:2 **19:20:** Rev 13:12-17, Rev 20:10,15, Aes 30:33

19:21: Rev 19:17-18

20

Nuk wan-taosen

¹ Nənə iakətoni agelo riti rukrutə ia neiai mameiwaiu pehe, mauvehi ki riti ia rəgɪn, ki səvəi nɪpəg sə rameiwaiu nukunen riwən. In rauvehi mwi jen asori riti. ² In rəkwtəmhiri snek asori, snek sə rɪnarə raka tui nəghɪn nə ləremhə uə Setan. Agelo nəha rəkwtəmhiri, mərihi səvəi nuk wan-taosen, ³ mərarki pen ia nɪpəg sə rameiwaiu nukunen riwən, nənə məsisəg əknekɪn irə mɪnuə snek asori nəha trəpwəh mwi neikuəien ia nərmmama ia tənəmtənə me meste nuk wan-taosen ro sampam. Nəpɪn nuk wan-taosen ro sampam, tukaməkeikei kɪfi nari irə səvəi nəpɪn ouihi a.

⁴ Nənə iakətoni jea me nepwɪn səvəi nəmə asori me. Nəmə asori me səməme kamhəkure ia jea me nəha, kuvei pen nasoriien mɪnraha tuhaməkiri noien me mamhərpwɪn. Nənə iakətoni nənimwi nərmmama səməme kɪnərai əmwesi kənkəpwənraha ti nəri nə mə irəha kamhərer irəpw ti nɪni irəpwien nəgkiariien amasan səvəi Iesu mɪne nəgkiariien səvəi Kumwesən. Irəha həpwəh nɪnimwɪien nukurhunraha ia nɪsiaiien ia nəmri nərimɪru uə ia nəmri nəri kuvrhəkɪn kuvnhi nərimɪru irə, mhəpwəh nuvehiiien mak səvənhi ia nɪpwənanraha mɪne rəgɪnraha. Iakətoni irəha həuvehe mhəmɪru mwi, nənə mamhərimənu irəha Kristo meste nuk wan-taosen. ⁵ In i nəpɪn sə Kumwesən rɪməkupwən mo nərmmama irə hətui mwi ia nemhəien. Mətə nərmmama həuvamhə səməme in rɪpko mhə irəha hətui mwi ia nəpɪn

nəha tuhəpkətui mhə mwi ia nemhəien meste nuk wan-taosen ro sampam. ⁶ Nərmama me i səməme Kumwesən rīməkupwən mo irəha hətui mwi ia nemhəien, irəha rerinraha tragien, ti nəri nə mə irəha nəkur ikinan me səvənhi. Irəha tuhəpkemhə mhə mwi ia nemhəien sə ro kəru i, mətə irəha tuho pris me ia nirəha, pris me səvəi Kumwesən mine Kristo, nənə mhərimənu irəha min ia nuk wan-taosen.

Setan trevən ia napw

⁷ Nənə nəpən nuk wan-taosen ro sampam, tukifi nari ia Setan rier irapw ia kwopun kinəsisəg əknekən in ikin. ⁸ In trier irapw, mevən meikuə ia kwənəkwwus me nəha səməme kamharə ia nikare təkure tīprənə i kefə, nəghinraha Kauk mine Makauk, nənə mousəsimwin irəha mə tuharuagən. Nərmama me nəha tuhəpik məmwhen ia nipəkir ia təsi. ⁹ Iakətoni mə irəha həuvən ia kwopun me pam ia tīprənə, mhərer kuraukurau kwopun nərmama me səvəi Kumwesən kamharə ikin mine taon sə Kumwesən rokeikei pik. Mətə napw riti rukrutə ia neiai meiwaiu pehe mahi irəha. ¹⁰ Nənə kuvehi Setan, iəremhə sə rineikuə ia nirəha, kuvehi, kərarki pen ia kwopun əmwhenimw nəha napw mine təpisi ərəha krauuək ikin. In nəha kwopun nəha kinərarki pen raka nərimiru ikin mine profet eikuə. Nənə tuko nəmisəien minrahar ia nəpən mine ia ran ia nuk nuk me.

Kumwesən rəkiri nərmama səməme həuvamhə, mərpwin noien me səvənraha

11 Ia nəpɪn nəha iakətoni jea asori riti rəpsan mine Iəmə sə raməkure irə mamərimənu. Tɪprənə mine neiai krouap ti nənimen kɪpkətoni mhə mwi irau. 12 Nənə iakətoni nərmama həuvamhə səməme fwe kupwən kamhəuvehi nasorijen mine səməme həpkuvehi mhə nasorijen, irəha pam kamhərer ia nəmri Iəmə sə raməkure ia jea səvənhi mamərimənu. Nənə krɪpwegi nəkukuə me nepwɪn. Krɪpwegi mwi nəkukuə riti mwi, nəkukuə səvəi nɪmɪruien. Nənə Iəmə nəha rəkiri nərmama həuvamhə mesi pen nəgkiariien kɪmərai pen ia nəkukuə me nəha, mərpwɪn atukwatukw noien me irəha həno fwe kupwən. 13 Təsi raraka ia nərmama həuvamhə səməme kamharə irə. Noien Iərmama Remhə mine Imwei Nəkur Həuvamhə irau mwi krouaraka ia nərmama səməme kamharə ia nɪrau. Irəha pam hətui mwi ia nemhəien səvənraha, nənə Iəmə nəha rəkiri irəha kuatia kuatia, mərpwɪn atukwatukw noien me irəha həno fwe kupwən. 14 Nənə kuvehi Noien Iərmama Remhə mine Imwei Nəkur Həuvamhə kərarki pen irau ia kwopun əmwhenimw nəha napw rauək ikɪn. Nəri nəha in nəha nemhəien sə ro kəru i. 15 Nərmama me pam səməme kɪpkətoni mhə nəghɪnraha ia nəkukuə səvəi nɪmɪruien kərarki pen irəha ia kwopun əmwhenimw nəha napw rauək ikɪn.

21

Jerusalem vi

20:12: Dan 7:9-10, Mat 25:31-46, Wok Me 17:31, 2Kor 5:10, Rev 13:8 **20:13:** Rom 2:6, 1Pit 1:17, Rev 2:23, 22:12 **20:14:** 1Kor 15:26,55 **20:15:** Rev 13:8, 19:20

¹ Nənə iakətoni neiai vi mine tīprənə vi, tī nəri nə mə neiai akuas mine tīprənə akuas krouvehe rouiwən. Nənə təsi riwən mwi. ² Nənə iakətoni taon ikinan səvəi Kumwesən, in nə Jerusalem vi, rukrutə tī Kumwesən ia neiai mameiwaiu pehe. Taon ikinan nəha ramser rəmwhen ia tīnari sə pran rarkahu irə ia nəpīn tukiri pen vi a in kuvei pen m iərman səvənhi. ³ Nənə iakregi reri iərmama riti rupwinari ruku pen ia jea sə Kumwesən raməkure irə mamərimənu, rini mə, “Hətə ro! Təkwtəkwuni nəha Kumwesən rino rukwənu səvənhi irəha nərmama. In tramarə irəha mīnraha, nənə irəha tuhəuvehe nərmama me səvənhi. Kumwesən in tramarə tī nirəha, nənə muvehe Kumwesən səvənraha. ⁴ In trirai raka pam nise nənimenraha. Noien iərmama remhə mine nasəkien mine nəmisəien triwən, tī nəri nə mə narimnari tui me həuvehe mhəuvəiwən.”

⁵ Nənə Iəmə sə raməkure ia jea mamərimənu rini mə, “Hətə ro! Iakamo narimnari me pam həuvehe mhərməvi.” Nənə in rarə mīni mwi mə, “Rai pen nəgkiariien i ia nəkukuə, tī nəri nə mə nəgkiariien me i ho nīpərhienien nərmama həukurən nətīgiteien ia nirəha.”

⁶ Nənə in rərari mīni pehe tukw iou i mə, “Təkwtəkwuni nəha kīno sampam ia narimnari me pam! Iou i Alfa mine Omeka,^a nukunen mine

21:1: 2Tes 3:13 **21:2:** Aes 52:1, 61:10, Hip 11:16, 12:22, Rev 3:12 **21:3:** 2Kron 6:18, Sek 2:10, 2Kor 6:16, Rev 7:17 **21:4:** Aes 35:10, Aes 65:19 **21:5:** 2Kor 5:17, Rev 4:2,10 **21:6:** Sam 36:9, Jer 2:13, Jon 7:37, Rev 1:8,17; 22:17 ^a **21:6:** Alfa in leta sə rukupwən ia alfapet səvəi nəkur Kris. Omeka in leta sampam. Nəhag i kaməkwein Kumwesən irə nīpwran mə in nukunen mine nəkrəkwerin. Əvsini mwi Rev 21:6; 22:13.

nəkrəkwerin. Nərmama səməme həkwakwa iou takuvei pen nui minraha. Nui nəha kirkuvehi mhə nanimen. Nəmri nui nəha rauvei pehe nui kauvehi nimiruien irə. ⁷ Iərmama sə triskai meste naruağanien rukurau, iou takuvei pen narimnari me səməme iakuvəni pen raka tukwe in. Iou takuvehe Kumwesən səvənhi, nənə in truvehe nərik. ⁸ Mətə nərmama səməme kamhəhekir ia nərmama, mhəpwəh nahatətəien, mamho noien əmkemik, mamhousi əpune nərmama, mamhakres pran, mamho klepa, mamhəuvehi nahak, mamhəfwaki m nənimwi nari me, mine ieikuə me pam, imwənraha atukwatukw fwe ia kwopun əmwhenimw nəha napw mine təpisi ərəha krauuək ikin. Nəri nəha in nemhəien sə ro kəru irə.”

⁹ Nənə nagelo me nəha sefen kamhəpeki pesin me nəha sefen həukuər ia nərpwinien irəha sefen (nənə nərpwinien me nəha irəha nərpwinien sampam Kumwesən tro m nərmama), riti ia nagelo me nəha rini pehe tukw iou i mə, “Uvehe ro. Iakuə takahatən prən nəha, in pran səvəi kwəti sipsip, pwəh ikətoni.” ¹⁰ Nənə ia vison nəha Nənimwin rəriari miou iakətoni agelo nəha ruvehi iou iarouevən fwe ia təkuei riti rasori məpwəmwis. Nənə in rahatən taon ikinan nəha Jerusalem iakətoni ruku pen ti Kumwesən ia neiai mameiwaiu pehe. ¹¹ Taon ikinan nəha rukuraan ia nukuraanien səvəi Kumwesən. Ramserser rəmwhen ia kəpwier amasan riti kani mə tiaspa rəmher rəmwhen ia klas. ¹² Nəpai riti

21:7: 2Saml 7:14 **21:8:** Mat 25:41, Hip 10:38-39, Rev 19:20; 21:27; 22:15 **21:9:** Rev 15:1 **21:10:** Esik 40:2, Rev 21:2
21:11: Aes 60:1-2,19 **21:12:** Esik 48:30-35

rasori mæpwæmwis rukuraukurau iræ. Ia næpai næha kwæruæ me iræha twelef. Nagelo me twelef kamhærer ia kwæruæ me næha. Ia kwæruæ me næha kîmærai pen næghi kwænækwus me sævæi nækur Isrel iræha twelef. ¹³ Kwæruæ me næha kahar ia nîkare taon næha peraha, kahar mwi ia nîkaren prehi, kahar ia nîkaren pesu, nænæ kahar ia nîkaren parei. ¹⁴ Kæpwier asori me iræha twelef kamhækwætæmhiri æknekin nukune næpai næha sævæi taon næha. Nænæ kîmærai pen næghi aposol me twelef sævæi kwæti sipsip ia kæpwier me næha.

¹⁵ Agelo sæ ramægkiari miou rauvehi nari riti kîno ia kol truvehi mak sævæi taon iræ mine næpai sævænhi mine kwæruæ me ia næpai næha. ¹⁶ Nîkare taon næha iræha kefæ. Nasorîien sævæi nîkarkaren me mine næpwæmwîsien sævænraha rutæ hæmnæmwhen a. Agelo næha ruvehi næri næha rauvehi ia rægîn, muvehi mak sævæi nîkarkaren me, mætoni iræha kuatia kuatia nasorîien sævænhi mine næpwæmwîsien sævænhi rutæ tu-taosen-fohantret kilometa. ¹⁷ In ruvehi mwi nîkîmkîmien sævæi næpai næha mætoni ræmwhen ia sikisti-sikis mita. Mita næha sæ agelo næha rauvehi mak sævæi nari iræ ræmwhen a mwi ia mita næha nærmama kamhæuvehi mak sævæi nari iræ. ¹⁸ Næpai næha kîno ia kæpwier amasan i tiaspa, nænæ kuvrhækin taon ia kol atukwatukw, kol sæ ræmher mæmwhen ia klas. ¹⁹ Kæpwier asori me sæmæme kamhækwætæmhiri æknekin nukune næpai sævæi taon næha kæfæri pen iræha ia kæpwier amasan me sæpæmsæpæ. Kîmækupwæn kæmri pen kæpwier amasan i tiaspa, sæ ro kæru iræ kæmri pen kæpwier amasan i safæia,

sə ro kahar irə kəmri pen kəpwier amasan i akat, sə ro kefə irə kəmri pen kəpwier amasan i emeral, ²⁰ sə ro krirum irə kəmri pen kəpwier amasan i onikis, sə ro sikis irə kəmri pen kəpwier amasan i kanilian, sə ro sefen irə kəmri pen kəpwier amasan i krisolaet, sə ro eit irə kəmri pen kəpwier amasan i malakait, sə ro naen irə kəmri pen kəpwier amasan i topas, sə ro ten irə kəmri pen kəpwier amasan i kalsetoni, sə ro eleven irə kəmri pen kəpwier amasan i takwoes, nənə sə ro twelef irə kəmri pen kəpwier amasan i ametis. ²¹ Kwəruə me nəha twelef təpinhə me səvənraha kīno ia perel irəha twelef. Təpinhə kwatia kwatia ko ia perel kwatia kwatia. Nənə suatuk me fwe imwə ia taon nəha kīno ia kol atukwatukw, kol sə rəmher məmwhen ia klas.

²² Nənə iapkətoni mhə nimwə riti kaməfwaki ikīn ia nəkwai taon nəha, tī nəri nə mə nimwəfwaki səvənhi in nə lərimənu Kumwesən sə rauvehi nīskaiien me pam mīne kwəti sipsip. ²³ Ia taon nəha irəha tuhəpkətui mhə mwi meri mīne məkwə mə trouəhiəpwīn irəha tī nəri nə mə nukuraanien səvəi Kumwesən raməhiəpwīn pam taon nəha, nənə kwəti sipsip in nə laet səvənhi. ²⁴ Nərmama ia tənəmtənə me tuhəvən ia nukuraanien səvənhi, nənə kīg me ia təkure tīprənə tuhəpeki nautə amasan me səvənraha mhəuvnimwə ia taon nəha. ²⁵ Kwəruə me səvəi taon nəha tukəpwəh nəpīnhəien irəha ia nəpīn riti, tī nəri nə mə nəpīn ia nəpīn triwən ia kwəpun nəha. ²⁶ Nərmama ia tənəmtənə me tuhəpeki nautə amasan me

səvənraha mine narimnari me nərmama həməuvei pen mınraha ia nisaiien, nənə mhəpeki mhəuvnimwə ia taon nəha. ²⁷ Narimnari me səməme həmkemik ia nəmri Kumwesən, mine nərmama səməme kamho narimnari səvəi naurisien, mine nərmama səməme kamheikuə, irəha tuhəpwəh nuvnimwəien ia taon nəha ia nəpın riti. Mətə nərmama me a i səməme kimərai pen nəghınraha ia nəkukuə səvəi nımıruien sə kwəti sipsip rauvehi irəha əpa nəha tuhəuvnimwə ia taon nəha.

22

Nui aris kauvehi nımıruien irə

¹ Nənə agelo rarə mahatən mwi nui aris riti iakətoni. Nui ia nui aris nəha nui kauvehi nımıruien irə. Nui nəha rəmher rəmwhen ia klas, raiu maku pen fwe ia jea sə Kumwesən mine kwəti sipsip krauəkure irə rouərimənu, ² mamesi pen suatuk ia kurkwai taon nəha. Nənə iakətoni nei kauvehi nımıruien irə ramərer ia nıkarkare nui nəha, maukuə m twelef ia nuk me pam ia məkwə me pam. Nənə nərmama ia tənəmtənə me pam kamhətimwi nımwan ti nomasanien nəmhaien me. ³ Ia nəkwai taon nəha tukəpwəh mwi nətoniien nari riti sə Kumwesən raməkwein ərəha irə. Jea sə Kumwesən mine kwəti sipsip krauəkure irə rouərimənu trərer ikın. Nənə iotukwininari me səvənhi tuhamo nəkwən. ⁴ Irəha tuhətoni nənimen, nənə tukrai pen nəghın ia nıpwənanraha. ⁵ Nəpın ia nəpın

21:27: Aes 52:1, 1Kor 6:9-10, Rev 13:8, 21:8 **22:1:** Esik 47:1

22:2: Joel 3:18, Sek 14:8, Jen 2:9, Esik 47:12, Rev 22:14,19 **22:4:**

Sam 42:2, Mat 5:8, Rev 3:12 **22:5:** Dan 7:18,27, Rev 5:10, 20:6, Rev 21:23,25

triwæn. Iræha tuhæpkætui mhæ meri uæ nari riti mwi truvei pen nukuraanien minraha, ti næri næ mæ Iærimænu Kumwesæn sævænraha in trukuraan muvei pen nukuraanien minraha, nænæ iræha tuhærimænu ia nuk nuk me. ⁶ Nænæ agelo næha rini pehe tukw iou i mæ, “Nægkiariien me i ho nîpærhienien nærmama hæukuræn nætigiteien ia niræha. Iærimænu Kumwesæn sævæi nænîmwi profet kupwæn me rînærhi pehe iou agelo sævænhi mæ takuvehe mahatæn narimnari me triþko mhæ tui hæier pehe pwæh sævænhi iotukwininari me hætoni.”

Triþko mhæ tui Iesu ruvehe

⁷ “Hæregi ro! Triþko mhæ tui iakuvehe. Iærmama sæ ramo nægkiariien me sæmæme Kumwesæn ruvei pehe, kamhæmak ia nækukuæ i, in rerin tragien.”

⁸ Iou Jon, iou iakimæregi mætoni narimnari me i. Næpin iakregi mætoni raka narimnari me i, nænæ iakinîmwi nukurhuk mi ia næmri agelo sæ rahatæn iou iræ mæ takisiai in. ⁹ Mætæ in rini pehe tukw iou i mæ, “Æpwæh noien iamînha iræ! Krau iotukwininari mi a sævæi Kumwesæn kitaha piam me i profet me mine nærmama me sæmæme kamho nægkiariien me ia nækukuæ i. Nîmwi nukurhum mi ia næmri Kumwesæn, misiaï in!”

¹⁰ Nænæ in raræ mîni mwi tukw iou i mæ, “Tikæpwæh nærkwafæien ia nægkiariien me i Kumwesæn ruvei pehe mik kamhæmak ia nækukuæ i ti næri næ mæ narimnari me i triþko mhæ tui hæier pehe. ¹¹ Nærmama sæmæme kamho noien

ərəha pwəh kamhəmwur pen ia noien ərəha. Nərmama səməme kamho noien əmkemik pwəh kamhəmwur pen ia noien əmkemik. Nərmama səməme kamho noien atukwatukw pwəh kamhəmwur pen ia noien atukwatukw. Nərmama səməme kamho noien əmher pwəh kamhəmwur pen ia noien əmher.

¹² Həregi ro! Tripko mhə tui iakuvehe! Takuvehi nərəkuien səiou, muvehe, muvei pen m nərmama me pam resi pen narimnari me irəha həno. ¹³ Iou i Alfa mine Omeka,^a nukunen mine nəkrəkwerin. Iakinərə raka kupwən, nənə takarə mwi kurirə.

¹⁴ Nərmama səməme haikuas tinari səvənraha rəpsan, irəha rerinraha tragien. Takəsəni irəha hani nukwai nei kauvehi nimiruien irə, nənə mhəukurau ia kwəruə me səvəi taon nəha mhəuvmiwə. ¹⁵ Mətə nərmama nepwin nəha ikin ko həpkuvnimwə mhə. Irəha nəha nərmama səməme həmkemik rəmwhen ia kuri me, mamho klepa, mamho nahak. Nərman mine nīpran səməme kamhəiri əpnəpen irəha me irəha nəha ko həpkuvnimwə mhə. Nərmama me pam səməme kamhousi əpune nərmama, mamhəfwaki m nənimwi nari me, mamhokeikei pik noien səvəi neikuəien tuharə fwe iruə.

¹⁶ Iou, Iesu, iakinərhi pehe agelo səiou mə truvehe mīni irəpw narimnari me i tukumiaha nakalasia me. Iou i kig sə iakiməuku pen ia

22:12: Aes 40:10, 2Kor 11:15, Rev 2:16,23 **22:13:** Rev 1:8,17; 21:6 ^a **22:13:** Alfa in leta sə rukupwən ia alfapet səvəi nəkur Kris. Omeka in leta sampam. Nahag i kaməkwein Kumwesən irə nīpwrən mə in nukunen mine nəkrəkwerin. Əvsini mwi Rev 21:6; 22:13. **22:14:** Rev 22:2 **22:15:** Rev 21:17 **22:16:** Nam 24:17, Rom 1:3, Rev 2:28, 5:5

kwənəkʷus səvəi Kig Tevīt. Iou iakəmwhen ia kəməhau kofətəteia sə rukuraan.”

¹⁷ Nənimwīn Ikinan mīne pran səvəi kwəti sipsip krauni mə, “Uvehe!” Nənə pwəh iərmama sə ramregi nəgkiariien i, in mwī rīni mə, “Uvehe!” Nənə pwəh iərmama sə rəkʷakwa ruvehe. Iərmama sə rokeikei pwəh in rənīmwi auər a nui sə kauvehi nīmīruien irə.

¹⁸ Iou, Jōn, iakaməgkiari skai m nərmama səməme kamhəregi nəgkiariien me Kumwesən ruvei pehe miou kamhəmak ia nəkukuə i. Trīni mīnuə iərmama riti rakutan pen atukw nəgkiariien riti səvənhi ia nəgkiariien me i, Kumwesən truvei pen min nərpwīnien me i nəkukuə i raməgkiari irə makutan pen mwī.

¹⁹ Trīni mīnuə iərmama riti rīpeki raka nəgkiariien me nepwīn ia nəkukuə i, Kumwesən trīpeki raka namasanien me i nəkukuə i raməgkiari irə iərmama nəha trīpkuvehi mhə riti. Namasanien me nəha nukwai nei kauvehi nīmīruien irə mīne kwopun riti ia taon ikinan nəha.

²⁰ Iərmama sə rani irapw narimnari me i rīni mə, “Pərhien trīpkō mhə tui iakuvehe!”

Ouəh, pwəh ro iamīnhi! Uvehe rə Iərimənu Iesu!

²¹ Pwəh namasanien səvəi Iərimənu səkitaha Iesu tramarə ti nərmama me pam. Ouəh, pwəh ro iamīnhi!

22:17: Sing 8:14, Rev 21:6 **22:18:** Dut 4:2, 12:32, Rev 15:1,6

22:19: Rev 22:2 **22:20:** Rev 2:16

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 22 Feb 2024 from source files dated 31 Aug 2023

26b0f540-c192-5878-be67-18ede9ab1416